

MAK Jiysis Krays Minim Tep Mak Tikak Minim Nind Niņep

Baybol buk day biy Mak tikak. Nup ñin gunap Jon-Mak angyingipay (Apsol 12:13). Nonim nuk yimb ak Mariya. Nuk Jerusalem nimb (Apsol 13:12). Pol yip Banabas yip biynimb Jiwda mer gok kuyip Krays minim tep angñi tangying, Mak nup poñind amer tap kuyip gok marik giyingip (Apsol 12:25, 13:5). Kisen biynimb Jiwda mer gok kuyip minj kun biy tikak.

Minim Ar Keykey Mindip Rek:

Jon bi ñiņg pikñemb ak, Jiysis Krays minim tep ak kiñiņ gi angñak minim ak mindip, chapta 1:1-13.

Jiysis miñmon Galiyliy woņg kiñiņ gi gak minim ak mindip, chapta 1:14-9:50.

Jiysis Galiyliy nimb woņg gindand Jerusalem amnak minim ak mindip, chapta 10:1-52.

Jiysis ñin nuk ak maņ giy wiyk nokom bap mindakniņ, Jerusalem sek, yep maņ kun okok sek angñirangek minim ak mindip, chapta 11:1-15:47.

Jiysis tip tikjakak kesim ak mindip, chapta 16:1-8.

Jiysis kumiy tikjakek biynimb kuņaynep nup misen niņyak ak sek, arachak Nop ker amnak minim ak sek mindip, chapta 16:9-20.

¹ Jiysis Krays, Gor Ñinuk minim tep ak angniņg gispiyn.

² Wosrey, bi Gor minim anġep Asaya, Gor Ñinuk Jiysis Krays nup minim anġak rek, tikiy anġak:

“Niñan! Bi minim yand dand amningamb ak nind anġyoken am, kinjen nip ak pindrep geningamb.

³ Bi kun ak miñmon biynimb kuñay ma mindpay namb okok suk anġiy anġningamb, ‘Biyomb ak asaw! Kinjen yik mayik giy mindonimuñ gok pind yipund yimb giy mindenimimb anġningamb’ anġak.”

⁴ Gor kun anġek mey, kisen Jon bi ñing pikñemb ak, miñmon biynimb kuñay ma mindeyak namb okok mindyinq, biynimb gok apey kuyip minim anġñiy anġyinqip, “Tap siy tap timey gipun gok, yenen kun gipun anġiy kirgiy, ñing pikem mey, Gor tap siy tap timey gipim gach ak wiykyokningamb anġyinqip.”

⁵ Nuk kun anġakniñ, biynimb Jiwdiya propens yep kun okok mindeyak gok sek, Jerusalem biynimb sek minim nup ak niñning amniyak. Amiy, tap yerip yerip timey giyak gok misen anġñey, kuyip Joden ñing namb ak ñing pikñak.

⁶ Jon chech yikop kanj kamel kas diy giyak ak ay, kaw wak ler ak namb ak pongayinqip. Tap ñinemb nuk ak, joñ golbind ak sek, bum ñing ak sek ñimbyinqip.

⁷ Nuk biynimb gok kuyip anġyinqip, “Bi kisen winingamb ak Biyomb yimb, yand bi sikoy; nup niñen yip nambiñ gip. Tomb tirup nup ak tuñgasikyinq, tap nup gok marik ginim rek ma ayip.

⁸ Yand nimbip yikop ñiᅅg pikñimbiyn; nuk apiy nimbip Gor Kawnan ak yokniᅅgamb aᅅgak.”

Jon Jiysis Nup Ñiᅅg Pikñak
(*Mat 3:13-17; Luk 3:21-22*)

⁹ Pen ñin bap, Jiysis miñmon Nasaret Galiyliy propens mindyiᅅgip ak kirgiy, Jon mindek ak apek, nup Joden ñiᅅg namb ak ñiᅅg pikñak. Nup kun giy ñiᅅg pikñek,

¹⁰ Jiysis kumb biyoᅅ amnakniᅅ; semb biyoᅅ miᅅgan yikiy, Gor Kawnan ak yakir kochir rek, wiᅅind nup ker owak.

¹¹ Kun giy owakniᅅ, minim bap semb biyoᅅ nimb apiy aᅅgak, “Nand Ñi mapin yand yimb. Nip niᅅen, yip tep yimb giy aᅅgak.”

¹² Pen won kun anep, Gor Kawnan ak Jiysis nup gek, miñmon nep namb okok amiy;

¹³ ñin onep ñin jiwiy andikiy ar piskind ak mindyiᅅgip. Kun okok mindakniᅅ, Seytan, Jiysis nup gen minim yip ak kindik giy timey gaᅅ aᅅgiy, ap aᅅgyiᅅgip. Miñmon mindyiᅅgip wikan kun ak kayn ayndik tap gok nep mindyiᅅgip. Pen enjol gok, ap Jiysis nup bak ay kond mindyiᅅgipay.

Jiysis Bi Omiᅅal Omiᅅal Dak
(*Mat 4:12-17; Luk 4:14-15*)

¹⁴ Pen Gapman biyomb Herot Jon nup kalam-bis ayakniᅅ, Jiysis nuk miñmon Galiyliy amiy, Gor minim tep ak biynimb gok kuyip aᅅᅅniyiᅅg aᅅgak,

¹⁵ “Gor chinup diy kond mindeniᅅgamb aᅅgiy ñin per kond mindyiᅅgipim ak, miñiy wip! Tap siy tap timey gipim ak, yenen kun gipun aᅅgiy kirgiy,

Gor biynimb simb ninjy dingingamb minim tep ak, ninjind angip angiy dinimimb angak.”

¹⁶ Jiysis Galiyliy chemb gol ak pandikying ninjak; bi piysdep mamiyminjay ak piys dur angiy, wimben ak di ning namb biyan yokiy minderik. Bi mamiyminjay kun ak yimb kiykminjay ak, Saymon yip, Enjriw yip.

¹⁷ Kuyipminjay ninjy angak “Aper yand yip tangiy, nirip angñirep gen, bi biynimb dep ominjal ak mindeningayr angak.”

¹⁸ Angek ninjind angip angiy, wimben gok kirgiy, Jiysis yip nep tangyingipay.

¹⁹ Pen Jiysis tapin sikoy won bap amiy ninjak: Sebediy ñinuk Jemis yip, Jon yip bot mingan ak mindying, wimben pungrikak ak kopis kopis gi minderik.

²⁰ Kuyipminjay ninjy angak, “Nirminjay owiyrey angak.” Angek kiykminjay ninjy, nop nup bi gunap yip bot ar ak kirgiy, Jiysis yip amiy tangyingipay.

*Jiysis Kichekiy Ang Mis Yokak
(Luk 4:31-37)*

²¹ Pen kiyk miñmon yomb Kapaniyam amiy, Jiysis Jiwda lotiw minek ak; nan-gep korip mingan biyan amiy, Gor minim ak angñek;

²² biynimb gok ninjy jiwdiy angyak, “Bi low tiysa apay rek ma angip, biyomb yimb ninrep giy apay rek angip angyak.”

²³ Pen won kun ak, bi kichekiy amban ayak bap, korip mingan kun ak mindek ak suk angiy angak,

²⁴ “Jiysis bi Nasaret nimb! Nand yergining opan? Chinup gi timey gining opan rek ayip?”

Pen Gor ñin chinup anğayak ak ma wip. Yand nip niñbiyn: timey ma gipan; Gor Ñi tep nuk ak mindpan anğak.”

²⁵ Anğek, Jiysis kichekiy anup anğak, “Minim ma anğnimin! Bi anup kirgiy mis amnon anğak.”

²⁶ Anğek, bi anup gek jep diy, suk yomb anğakniñ, mis amnak.

²⁷ Kun gek niñiy, biynimb ap mindeyak gok wal yimb anğiy, minim anğniñ anğniñ giy anğyak, “Bi biy minim kisenimb ar bap dand wip rek ayip. Nuk bi kilis sek; kichekiy malñiluk gok anğip rek niñiy mis ambay anğyak.”

²⁸ Kun anğiy, Jiysis kichekiy malñiluk anğyokak minim kun ak, Galiyliy Propens okok mañgiysek anğñey amnak.

Jiysis Saymon Numok Nup Gek Suñ Ayak
(Mat 8:14-15; Luk 4:38-39)

²⁹ Pen Jiysis, Jemis, Jon, Saymon, Enjriw kiyk Jiwda nan-gep korip ak kirgiy, mis apiy, Saymon yip numam Enjriw yip korip ak amniñg sanđiyak.

³⁰ Korip amjakiy Jiysis nup anğyak, “Saymon numok nup, mumbwak okok mon rek yinek, kin mindip anğyak.”

³¹ Anğeyak, Jiysis am nup di jakñakniñ, wak mon rek yinek ak suñ ayakniñ, day tap keñmañgiy kuyip gok danğiyak.

Jiysis Biynimb Gok Gek Suñ Ayak
(Mat 8:16-17; Luk 4:40-41)

³² Pen pumb sanđind amnak won ak, biynimb tap gak gok yip, kichekiy ambañ ayak gok yip Jiysis gek suñ ayañ anğiy, mindek ak dand wiyak.

³³ Kapaniyam biynimb gok, ap kinjenrumb mis akyañ ken niñmindyakniñ,

³⁴ biynimb tap gak gok gek suñ ay, kichekiy malñiluk ambañ ayak gok añg mis yokiy gak. Pen kichekiy malñiluk kun gok Jiysis nup niñrep giyak rek, Gor Ñinuk ap mindip biy añgiy misen añgning geyak, kuyip minim ma añgnimimb añgiy, añg mis yokak.

Jiysis Miñmon Galiyliy Tangyিংgip
(Luk 4:42-44)

³⁵ Minek, Jiysis maynamb yimb tikjakiy, dawin kun ak kirgiy wikan bap key amiy, Nop nup añgniñ mindek.

³⁶ Pen binuk Saymon; binuk gunap yip Jiysis akay añgiy, piyow dand amiy,

³⁷ nup niñiy añgyak, “Biynimb mañgiysek nip akay añgiy piyowsipay añgyak.”

³⁸ Kun añgeyak, Jiysis añgak, “Miñmon wikan bap nep añgñiyn añgiy ma winik; miñmon gunap kunep añgñiyn añgiy winik rek nem amnun añgak.”

³⁹ Kun añgiy, miñmon Galiyliy namb okok girangyিং, am Jiwda nan-gep korip miñgan gok amiy, Gor minim añgñiying, biynimb kichekiy malñiluk ambañ ayak gok Jiysis kichekiy malñiluk gok añgek mis amniyak.

Jiysis Bi Soy Ayndik Ayak Bap Gek Suñ Ayak
(Mat 8:1-4; Luk 5:12-16)

⁴⁰ Bi soy ayndik ayak bap Jiysis mindek siñak apiy, koñgim yimiy añgak, “Nand soy yip ak gey suñ ayniñg; gey suñ aynimun añgak.”

⁴¹ Kun angek, Jiysis nup simb ninjy angak, “Nip gen suŋ ayniŋgamb angyi,”

⁴² diniŋakniŋ suŋ ayak.

⁴³ Pen nup minim kilis angyi angak,

⁴⁴ “Kinjeŋnamb okok amyiŋg, biynimb gunap kuyip Jiysis yip gek suŋ ayip angyi ma angnimin. Yipund giy nep am bi Gor nup simbongep anup yomiy, soy ayndik yip ak suŋ ayip angyi, Mosis nind angak rek tap gunap pikiy, dam Gor nup simbonŋ ñenimin mey; biynimb gok bi ak miñiy suŋ ayip angyi niŋniŋgambay angak.”

⁴⁵ Kun angak ak pen; bi kun ak nuk amiy, biynimb okok monmon anŋñek mey, Jiysis miñmon okok misen giranŋonimuŋ rek ma ayek, nuk am biynimb kuŋay ma mindeyak namb okok mindakniŋ, biynimb miñmon kind kind nup niŋniŋg apyiŋgipay.

2

Jiysis Bi Ñin Tomb Kalaw Gak Bap Gek Suŋ Ayak (Mat 9:1-8; Luk 5:17-26)

¹⁻² Kisen pen Jiysis tip ak miñmon Kapaniyam apek, ap mindip korip ak angey ninjy, biynimb kuŋaynep ap gey gey, korip miŋgan, kinjeŋrumb mis ar akyaŋ timbik giy yimb angak. Kun gek, Jiysis korip miŋgan akyaŋ nep mindyiŋg, minim anŋñak.

³ Kuyip Gor minim anŋñi mindakniŋ, bi onep tiŋgawip ak, bi ñin tomb kalaw gak bap, yirar ay dand apiy niŋyak:

⁴ tip ak timbik giy yimb angek, bi ñin tomb kalaw gak anup dand korip ar biyon amiy, korip ak tungyikiy, yokey Jiysis mindek biyan amnak.

⁵ Pen nuk gek sun ayningamb angyi niyyak rek, Jiysis angak, “Ñi yand. Tap siy tap timey gipan gach ak wiykyoksiyiyn angak.”

⁶ Kun angek, Jiwda low tiysa gunap bising mindeyak gok gos kiyk okok nep niyy angyak,

⁷ “Bi biy yenen Gor nup anğ sikoy giying, ap tom gisap? Biynimb gok tap siy tap timey gey, bi bap gach kuyip ak wiykyoknimun rek ma ayip; Gor nep mey, gach wiykyokningamb angyak.”

⁸ Pen Jiysis gos niyyak kun ak key niyy angak, “Yenen gos kun ak rek kun giy niñbim?”

⁹ Bi ñin tomb kalaw gip anup yerip angen, nimbip tep giningamb? Tap siy tap timey gipan gach ak wiykyoksiyiyn angen nimbip tep giningamb akan; tikjakiy minj nak ak wining dand amnon angen, nimbip tep giningamb?

¹⁰ Yand nimbip aspiyn: Bi bap Ñinuk man ar biy awak ak, key niyy ma awak, Gor angek awak ak mey; nuk tap siy tap timey gipay ak niyy kirgining, kirginingamb angak.”

¹¹ Kun angyi, bi ñin tomb kalaw gak anup angak, “Yand nip aspiyn: tikjakiy, minj band nak ak dand korip amnon angak.”

¹² Angek, won kun anep tikjakiy, minj band nuk ak dand sandak. Kun gek niyy, biynimb gok wal yimb angyi, Gor nup yimb ak dand aranying angyak, “Nind tap kun ak rek bap gey, ma niñuk angyak.”

*Jiysis Liypay Nup Suk Angak
(Mat 9:9-13; Luk 5:27-32)*

¹³ Jiysis ñin bap tip ak andkind Galiyliy chemb gol okok amek, biynimb kunaynep nup ninjy ap nan-geyak, kuyip Gor minim tep ak anğñak.

¹⁴ Kun giy anğñi diy; kinjenamb okok amying ninjak; Alpiyas ñinuk Liypay, bi takes dep ak, wong giyingip korip mingga ak bising mindek. Nup ninjy, “Apey yand yip tanğor angek,” tikjakiy yip tanğyngipiyr.

¹⁵ Jiysis pen, binuk gok yip am Liypay korip ak tap ñinyakniñ, bi takes dep gok sek, bi tap siy tap timey giyak gok sek Jiysis yip tanğeyak rek, yip jimñiy tap ñinyak.

¹⁶ Bi Peresiy low tiysa mindeyak gunap, Jiysis binuk gok kuyip angyak, “Jiysis yenen bi takes dipay gok yip, tap timey gipay gok yip tap ñinimb?”

¹⁷ Anğeyak, Jiysis minim kun ak key ninjy anğak, “Biynimb suñ gok, dokta niñning ma ambay; biynimb tap gip gok nep niñning ambay. Bi bap Ñinuk biynimb suñ-tep mindpun angyi niñbay gok kuyip, di Nop yip jimñining ma awak; biynimb tap siy tap timey gipun angyi niñbay gok kuyip, di Nop yip jimñining awak anğak.”

*Biynimb Gunap, Jiysis Nup Tap Bul Gep Minim
Ak Anğ Niñyak*

(Mat 9:14-17; Luk 5:33-39)

¹⁸ Peresiy kay bi kiyk gok sek, Jon binuk gok sek ñin gunap lotiw nep mindonjun angyi, tap ma ñimbyngipay ak mey, biynimb gunap apiy Jiysis nup angyak, “Peresiy kay bi kiyk gok sek, Jon

binuk gok sek ñin nokom nokom tap ma ñimbay. Pen binak gok, yenen kun ma gipay angyak.”

¹⁹ Angeyak, Jiysis miñ giyinjipay ar kun ak ma giningambun angyi, paydon ay angak, “Bi biyn diniņ giningamb bap, numiy numam gok yip mindiy, tep gakniņ mindeniņgambay ak mey, tap keñmaņgiy ma kirginiņgambay.

²⁰ Pen kisen biynimb gunap bi kiyk kun anup dand ameniņgambay, simb gek, ñin kun ak tap ma ñiņniņgambay.

²¹ Pen chech kisenimb band bap diy, chech wor ay puņgrikiņgamb tam ak ñaņg dey; chech kisenimb ak kilis mindyiņg, chech wor ayniņgamb band ak puņgrikiy, chech kiyk ak takiy nep puņgrikek amniņgamb.

²² “Ñiņg wayn ak kunep. Ñiņg wayn kimnimb ak diy, meymey wak nindnimb miņgan ak ma sonņ aypay. Yenen: sonņ ay simjen ñey; meymey wak ak biņ angyi, puņgrikiy sonņ am diniņgamb. Kun ak mey, ñiņg wayn kimnimb ak, meymey wak kimnimb miņgan ak nep sonņ ayep angak.”

Minim Okok Sek, Lotiw Ñin Minim Ak Sek Gor Ñinuk Kond Mindip

²³ Kisen Jiwda lotiw ñin bap, Jiysis binuk gok yip wiyt wonņ namb ak amyiņg, binuk gok wiyt maņgiy gunap tikiy, wak pik yokiy ñimbyiņg ameyak.

²⁴ Kun gey, Peresiy bi gok niņiy, Jiysis nup angyak, “Miñiy lotiw ñin chin wonņ magep ak, binak gok yenen wiyt maņgiy tik wak pikyokiy ñimbsipay angyak.”

²⁵ Angeyak, Jiysis angak, “Basind Depiyt wosrey yiwan gek gak kesim tikyak ak, ma ninbim?”

²⁶ Wosrey binak Abayra bi Gor nup simbongep yomb yimb mindyngip ñin ak, Depiyt binuk gok yip kuyip yiwan gek, Gor angninep korip ak amiy, bired biynimb yikop gok ma ñimbay; bi Gor nup simbongep gok nep ñimbay ak angniney, ñek ñinyak ak pen, Depiyt timey gak angyi ma apun. Yiwan gek gak apun angak.”

²⁷ Kun angyi angak, “Ñin bap yikop mindep minim ak nind angyi, kisen biynimb gok ma gayak; kuyip gay añin ay mindrep giyan angyi, ñin bap yikop mindeningiy angak.”

²⁸ Pen Nop angek, “Bi bap Ñinuk tap okok kond mindiy, lotiw ñin ak kunep kond mindiy gif angak.”

3

Jiysis Bi Ñin Kalaw Gak Bap, Lotiw Ñin Ak Gek Sun Ayak

(Mat 12:9-14; Luk 6:6-11)

¹ Ñin bap pen, Jiysis tip ak andkind Jiwda nangep korip ak amiy ninak: bi ñin kalaw gak bap korip mingan kun ak ap mindek.

² Bi Peresiy gok Jiysis yerip rek gek, Jiwda kanjsol miytiy giy nup kor ginjun angyi, kapkap ninmindeyak.

³ Jiysis bi ñin kalaw gak anup angak, “Tikjakiy, sinbiy owan angak.”

⁴ Angek, nuk mindek sinak apek, kuyip angak, “Lotiw ñin chin ak yergep? Tep gep akan timey gep? Biynimb gok kuyip simb ninjiy gon kim

amningiy akan, kirgon kumningiy?” Angek, nup pen minim bap ma angyak.

⁵ Biynimb minim nup ma dinjun angyi niňyak kun gok kuyip, niňek nup mapin akak ak pen; gos tep ma niňbay angyi, kuyip simb niňak. Kun ak kuyip niňdand pandikiy, bi ñin kalaw gak ak nup, ñin parsek ayan angek, parsek ayakniň suň ayak.

⁶ Kun gek niňiy, bi Peresiy gok am Herot binuk mindeyak ak amiy, minim angnin angnin giy, Jiysis nup kun kun giy ñanğjun angyak.

⁷⁻⁸ Jiysis pen kuyip kirgiy, binuk gok diy, am Galiyliy chemb gol siňak mindyakniň, biynimb kuňaynep wiyak. Galiyliy biynimb gunap, Taya-Saydon biynimb gunap, Jerusalem biynimb gunap, Jiwdiya biynimb gunap, Yidumiya biynimb gunap, Joden ñing pis tawakdon ken biynimb gunap nuk giyngip ar ak angey niňyak ak mey, nup niňning wiyak.

⁹⁻¹⁰ Pen nup diniňon chinup suň ayingamb angyi, ap chichmiy yim gey apek, binuk gok kuyip angek, bot bap di ayrep giyak.

¹¹ Pen biynimb kichekiy malñiluk tap yerip amban ayak gok, Jiysis mindek siňak kongim yimiy, minim yomb angyi angyak, “Nand Gor Ñinuk yimb angyak!”

¹² Jiysis pen, kichekiy malñiluk gok kuyip minim kilis angyi angak, “Minim kun ak misen ma angnimimb angak.”

*Jiysis Binuk Onep Wimingan Ak Dak
(Mat 10:1-4; Luk 6:12-16)*

¹³ Pen Jiysis miñmon taw bap amiy, binuk diniň gak gok angek apeyak angak,

14 “Yand nimbip bi onep wimingan ak dispiyn ak mey, yand yip tanjiy, bi minim yip dand amemb gok mindiy, angyoken am biynimb okok kuyip angñiningambim.

15 Nimbip aspiyn ak mey, kichekiy malñiluk tap gok kunep angyokningambim angak.”

16 Jiysis binuk dak kun gok yimb kiyk mey, bap Saymon, kisen Jiysis yimb nup bap Piyta angak.

17-19 Bap Jemis, numam bap Jon, nop kiymingay yimb ak Sebediy. Jiysis kuyipmingay, timuk-bi angak. Binuk bap Enjriw; bap Piyliyp; bap Batlomiwiw; bap Matyiw; bap Tomas; bap Jemis, nop nuk yimb ak Alpiyas. Bap Taydiyas, bap Saymon, nup Saymon Selot angyak. Bap Jiwdas Yiskariyot. Nuk mey, kisen Jiysis nup mimungak.

Jiysis Nup Seytan Amban Ayip Angyak

20 Pen Jiysis korip amek, tip ak biynimb kunaynep ap nan-gi mindyakniñ, binuk gok yip tap ñiñningiy rek ma ayak.

21 Kun gek, biynimb gunap Jiysis sakiy ayip angey niñiy, nonim, nunay, numam sikop nup poñdining wiyak.

22 Pen Jiwda low tiysa Jerusalem nimb wiyak gok angyak, “Belsiybul Jiysis nup amban ayip rek, malñiluk tap gok angyokip angyak.” Nup yesek kun angeyak,

23 nuk biynimb gok kuyip angek apeyak, minim ar kun ak paydon ay kuyip angrep giy angak, “Seytan yergiy Seytan nup angyokningamb?”

24-25 Biynimb miñmon nokom bap kiyk keynep penpen giningambay ak, wikan kun ak asik

keykey ayniᅅgambay. Pen amyong apyong gok kunep penpen giy, asik keykey ayniᅅgambay.

²⁶ Kun ak rek, Seytan nuk key kichekiy, malñiluk tap nuk gok ma aᅅyokningamb.

²⁷ “Bi kalrimey bap mindakniᅅ, bi bap am, tap nup gok ma diniᅅgamb; miñ di tiwning ay nep mey, am tap nup gok diniᅅgamb.

²⁸ “Pen niᅅrep ginimimb! Biynimb gok tap siy tap timey yerip yerip giniᅅgambay ak, Gor nup aᅅniᅅey, niᅅiy kirginiᅅgamb. Bapiy nup akaᅅ yip aᅅjiwningambay ak, kunep, kuyip niᅅiy kirginiᅅgamb ak pen,

²⁹ Kawnan nuk ak nup aᅅjiwningambay ak, niᅅiy ma kirginiᅅgamb. Miker kun ak perper mindeniᅅgamb aᅅgak.”

³⁰ Jiysis nup, Seytan yip mindip aᅅgeyak mey; kun aᅅgak.

Jiysis Nonim Numam Nuk Gok

³¹ Pen Jiysis nonim numam sikop ap mis akyan mindyiᅅ, nup “Owan” aᅅgey,

³²⁻³⁵ biynimb korip miᅅgan biyaᅅ nup piᅅiy kuskus gi mindeyak gok aᅅgyak, “Nanim namam sikop ap mis biyaᅅ mindiy, nip owan aspay aᅅgyak.” Kun aᅅgeyak, Jiysis biynimb mindeyak gok niᅅdand pandikiy aᅅgak, “Nimb mey amiy yand, mam yand gok mindpim. Biynimb Gor aᅅgip rek niᅅdipay gok mey, amiy, mam, ay yand gok rek mindipay aᅅgak.”

4

*Tap Yin Yimemb Minim Paydon Ayak
(Mat 13:1-9; Luk 8:4-8)*

¹ Jiysis Galiyliy chemb gol ak amiy, biynimb gok kuyip tip ak minim anğñi mindakniñ, biynimb kuñaynep ap nan-giyak. Kun geyak, Jiysis bot ar ak bisgiy, am ñiñg namb siñak mindyñg, kuyip minim anğñak.

² Minim kun gok paydon ay, ar keykey nep anğñak.

³ Ar bap paydon ay anğak, “Minim anğniñg gispiyn ak niñim! Bi bap woñgday nuk ak piken piñiy gayrep giy, wiyt mañgiy dam diyokek am-nakniñ,

⁴ gunap kinjeñ kosemb ar ak yapeniñgamb, yakir gok ap ñiñniñgambay.

⁵ Gunap kamb ar man siskoy ayniñgamb okok yapiy jakniñgamb ak pen;

⁶ kindiy paryomb ma amnak rek, pumb niñiy milip giniñgamb.

⁷ Gunap kikasik dindbiliñ mindeniñgamb namb okok yapiy jakniñgamb ak pen, kikasik dindbiliñ gok pik ñimbek mañgiy ma piyningamb.

⁸ Pen gunap man tep ar ak yapiy, jakrep giy, mañgiy piyrep yimb giniñgamb. Gunap mañgiy ñin jiwiy rek piyningamb, gunap mañgiy ñin jiwiy omiñal rek piyningamb; gunap ñin jiwiy onep tiñgawip ak rek piyningamb anğak.”

⁹ Jiysis minim kun ak anğjiwyñg anğak, “Nimb biynimb gos timund sek mindenimimb gok, minim aspiyn biy niñnimimb anğak.”

*Minim Paydon Ayak Kiñiñ Ak
(Mat 13:10-17; Luk 8:9-10)*

¹⁰ Biynimb Jiysis minim angakniñ, ap niñmindeyak kun gok keykey amniyakniñ, binuk onep wimiñgan ak sek, biynimb nuk gunap sek nup angyak, “Minim paydon ay apan kiñiñ ak yerip angyak.”

¹¹ Angeyak angak, “Gor biynimb diy kond min-denigamb minim ma niñyngipay ak; nimb niñiy niñningambim ak pen; biynimb gunap minim nup ma niñjun apay rek, kuyip paydon ay nep angnimbiyn.

¹² Kiyk Asaya angak rek:
‘Windin niñbay ak pen, tap gunap ma niñbay. Minim niñbay ak pen, minim kiñiñ angyip kun angyi ma niñbay. Niñrep gipyap rek, Gor nup angninembiyap, tap siy tap timey gipay ak niñiy kirgipkop’ angak.”

*Paydon Ayak Minim Junj Ak Angnak
(Mat 13:18-23; Luk 8:11-15)*

¹³ Jiysis kun angyi kuyip angak, “Minim paydon ay angen ma niñbim kun ak; yergiy kisen minim paydon ay angeningayn niñningambim?”

¹⁴ Wiyt yiñ ak, Gor minim nup ak angyi apiyn.

¹⁵ Mangyi gunap kinjen yomb ar ak yapek, yakir gok ap niñningambay apiyn ak; biynimb gok Gor minim niñbay ak pen, won ak Seytan ap gek, sakiy gipay angyi apiyn.

¹⁶⁻¹⁷ Pen gunap kamb ar man siskoy ayningamb okok yapiy jakningamb ak pen, kindiy am wos ma gek, pumb niñiy milip giningamb apiyn ak; Gor minim ak kisen won ak niñey tep gakniñ

diningambay ak pen, yep won bap mindiy, biynimb gunap minim angey ninjiy akan, miker gunap apek, minim nup ak kirginingambay anjiy apiyn.

¹⁸⁻¹⁹ Pen kikasik dindbilin namb ak yapiy jakiy manjiy ma piyningamb rek mey; biynimb Gor nup minim ninningambay ak pen; wonng wariy, korip minj kinemb, tiw minan, maniy, tap okok gosimb ninjiy, anjip rek ma giningambay.

²⁰ Wiyt manjiy man tep ar ak yapiy jakrep giy, manjiy ñin jiwiy akan, ñin jiwiy gunap rek piyningamb apiyn ak; biynimb Gor minim ninjiy nup pisnep chingipay gok apiyn. Gunap nup direp gipay; gunap nup direp yimb gipay; gunap nup direp giying, ar kun ak key yimb gipay anjiy apiyn angak.”

*Lam Ak Dangiy Ar Sinjiyon Tik Ayep
(Luk 8:16-18)*

²¹ Jiysis pen tip ak, minim bap paydon ay angak, “Lam ak dangiy, bonng molik okok akan, tiyn mingan okok ma aypay. Melik ginimun anjiy, ar sinjiyon tik aypay.

²² Kun ak rek, minim yerip yerip miñiy weygiy mindip gok, kisen Gor gek misen ninningambay.

²³ Nimb biynimb gos timund sek mindenimimb gok minim apiyn biy ninrep ginimimb angak.”

²⁴ Kuyip minim bap angak, “Minim ninjipim ak ninjiy, ninrep ginimimb. Biynimb minim yiñrimey rek angingambay gok, Gor kuyip kunep yiñrimey rek angingamb. Biynimb minim sayn rek angingambay gok, Gor kuyip kunep minim sayn rek angingamb.

25 Biynimb minim ninjiy ninjdiningambay gok, Gor kuyip gos tep ñek gunap sek ninningambay; pen ma ninningambay gok, kiyk siskoy ninbay ak ninjek tap rek ma ayek, yiwur yomb ñiningamb angak.”

Gor Biynimb Nuk Diy Kond Mindeningamb

26 Minim bap pen angak, “Gor biynimb diy kond mindeningamb ak, bi wonḡ nop gok wiyt manḡiy jakan anḡiy, dam wonḡday kiyk okok yokey jakip rek nep giningambay.

27 Wiyt manḡiy wonḡday okok yokiy, kin tanḡyakniḡ, gup giy jakningamb ak pen; yergiy jakip anḡiy ma ninningambay;

28 man ak key gek jakiy, manḡiy piy, pik giningamb.

29 Pen wonḡday nop nimb ak pikgek ninjiy, tik dand wep ñin ak wip anḡiy, tik dand winingamb angak.”

Biynimb Kunay Miñmon Keykey Okok Gor Anḡip Rek Ninjdiningambay

(Mat 13:31-32; Luk 13:18-19)

30 Jiysis kun anḡiy angak, “Gor biynimb diy kond mindeningamb ak, kesim yerip rek ak diy anḡen ninningambim?

31-32 Mey, mon mastet yin rek ak anḡnim. Tap yin gunap yomb yimbay gok sikoy jakip, pen mastet yin ak sikoy yimb yimey jak yomb giy, alik pikek, yakir gok ap sisiy kun okok aymindpay angak.”

Jiysis Minim Paydon Ay Anḡyinjip

(Mat 13:34-35)

33 Jiysis biynimb gok kuyip minim paydon ay kun gok rek kuñaynep angniyingip.

34 Minim misen angnen ma dingingambay angyi, paydon ay nep angniy, kisen binuk gok yip key mindyng, minim junj gok angnirep giyingip.

Jiysis Angek Yingen Ak Kirgak
(*Mat 8:23-27; Luk 8:22-25*)

35 Nin kun anep dungep won ak, Jiysis binuk gok kuyip angak, “Kind bindon amnun angak.”

36 Kun angyi, binuk gok yip biynimb kuñaynep ap mindeyak gok kuyip kirgiy, bot Jiysis mindek miñgan ak amiy, bot gunap mindakniñ, kiyk san diyak.

37 Namb amniyakniñ, day yingen yindmund apiy, niñ siy pang bot miñgan ak amiy, pongek yowning rek gak.

38 Jiysis nuk pen bot miñgan day akneñ ken, piy-low jun ay kinakniñ; binuk gok nup am kikawin giy angyak, “Tiysa, chin mangyisek kumning gispun gos ak ma niñban?”

39 Angeyak, Jiysis tikjakiy, yingen yindmund dek ak sek, niñ siy pang apek ak sek angek kirgak.

40 Pen binuk gok kuyip angak, “Yenen pirikpim? Gor chinup ma kond mindip angyi niñbim?”

41 Angek, kiyk wal angyi, pen angninek pen angninek giy angyak, “Bi kun biy an? Yergiy angamb yingen yindmund ak sek, niñ pang apamb ak sek angyip rek gip angyak.”

5

*Bi Kichekiy Ambañ Ayak Bap
(Mat 8:28-34; Luk 8:26-39)*

¹ Jiysis binuk gok yip bot diy, Galiyliy chemb tikiy Gerasa biynimb mindeyak kind akdoñ ken amjakyakniñ,

² bi kichekiy ambañ ayak bap Jiysis mindek ak awak.

³⁻⁴ Bi kun ak chip komyak kamb miñgan okok kin tanğyngip. Nup per sen diy, ñin tomb okok aybirikyngipay ak pen, sen gok gek puñgrikek, amyngip. Giyngip kun ak, nup gey gos niñnimuñ rek ma ayak.

⁵ Pumbnamb kisyimken, chip komyngipay kamb miñgan okok sek, miñmon yirik okok sek gawil girangyng, kamb diy mumbwak nuk gok key timbyngip.

⁶ Pen ñin kun ak nuk Jiysis nup parchim niñiy, puñgrikind angiy am apek siñak koñgim yimek,

⁷⁻⁸ Jiysis kichekiy ambañ aymindek anup angak, “Kiriñ mis amnoñ angak.”

Angak angak, “Jiysis. Gor Biyomb sikerek Ñinuk. Yip yerginyng opan? Gor mindip rek yip miker ma ñinimin angak.”

⁹ Kun angak, Jiysis bi kun anup angak, “Yimb nand yerip?” Angak angak, “Yip kichekiy kuñaynep ambañ ayip rek, yimb yand ‘Kuñaynep’ angak.”

¹⁰ Pen Jiysis nup, kichekiy gok kuyip paryomb okok ma angyoknimin angiy, angninyng nep mindek.

11 Won kun ak, kanj kuṅay yimb, tiw tawsin rek, amil ñimbeyak pir siṅak ak mey,

12 kichekiy gok Jiysis nup aṅgyak, “Chinup aṅgey, am kanj guniyon kuyip molik sikun aṅgyak.”

13 Kun aṅgey, kichekiy gok aṅgyokek, am kanj gok kuyip molik sikey, puṅgiw minduṅ biyaṅ amiy, gi dam ñiṅg biyaṅ pikiy, maṅgiyseḱ ñiṅg ñimbiy kumdiyak.

14 Pen bi kanj mokiṅgipay gok, am dawin yomb gok, miñmon yikop gok minim kun ak aṅḡneyak, biynimb gok am niṅun aṅgiy, Jiysis mindek ak wiyak.

15 Apiy niṅyak: bi kichekiy kuṅaynep ambaṅ ayak kun ak; chech yimiy biṅṅ mindrep gek, kuyip jel gak.

16 Biynimb nind ap mindeyak gok, kisen wiyak gok kuyip, Jiysis yerer gak ak aṅḡniyak. Pen kanj gok kuyip yerer gak ak kunep aṅḡneyak niṅiy,

17 Jiysis nup aṅgyak, “Miñmon chinup biy kirgiy amnon aṅgyak.”

18 Aṅgeyak, Jiysis bot diy amniṅg gek, bi gek suṅ ayak ak aṅgak, “Yand yip amjur akan?”

19 Aṅgek aṅgak, “Korip nak amiy, biynimb nak gok kuyip, Gor nip simb niṅiy yerer gip minim ak, aṅḡnininim aṅgak.”

20 Aṅgek, bi kun ak miñmon Dekapoliys gi-ranḡyiṅg, Jiysis nup yerer gak ak, biynimb gok kuyip aṅḡnek niṅiy, wal yimb aṅgyak.

Jiysis Gek, Biyn Bap Suṅ Ay, Pañ Kumak Bap Tikjakiy Gak

(Mat 9:18-26; Luk 8:40-56)

21 Jiysis pen bot diy, tip ak andkind am Galiyliy chemb pis tawakdon ken mindakniñ, biynimb kuñaynep wiyak.

22-23 Bi bap yimb nuk Jayras. Nuk Jiwda nan-gep korip ak kond mindyngip. Jiysis nup niñiy, ap mindek siñak kongim yimiy angak, “Pañ mapin yand ak kumning gisap. Nand ap nup diniñey, jak amnan angak.”

24 Angek, Jiysis tikjakiy Jayras yip amnirikniñ, biynimb kuñaynep am Jiysis nup namb ay dand amniyak.

25 Pen biyn bap, biyn kinjen pandikakniñ mindek simiy yin wimingan ak ayak.

26 Biyn kun ak dokta gok kuyip, yip gey suñ ayan angiy, maniy tawyngip ak pen, nup gey suñ ma ay, tapin yomb yimb gak.

27-28 Pen nuk Jiysis giyngip minim ak angey niñak rek, am chech band nup ak nep diniñen suñ aynngamb angiy, biynimb kuñay mindeyak namb ak,

29 mindek kund okok ken apiy, chech nup ak diniñek, likañ yapyngip ak milip gak. Namb nuk akyan key niñak nup suñ ayak.

30 Pen Jiysis nup gak kun ak key niñiy; tungandikiy biynimb gok kuyip angak, “Chech yip ak an diniñsap?”

31 Angek, binuk gok angyak, “Biynimb kuñaynep nip chirok ñimbay ak, yenen yip an diniñimb angiy aspan angyak.”

32 Kun angey, Jiysis minim kuyip angyak ak ma diy, an diniñimb angiy piyowniñ mindek.

³³ Pen biyn kun ak, nup yerer gak ak ninjy, pirikiy jep di giy, ap Jiysis mindek sinjak kongim yimiy, nup sunj ayak minim ak misen anggak.

³⁴ Jiysis pen anggak, "Pañ yand. Gor yip gek sunj ayningamb angiy gos ninban rek, nip gek sunj ayip nen, amiy mindrep ginimin anggak."

³⁵ Jiysis minim kun ak anggakniñ, Jayras binuk gunap, korip nuk animb apiy angyak, "Panak mindarik kumimb; tiysa nup angey tomb yiwur ma winimun; angey andkind amnimun angyak."

³⁶ Kun angyak ak pen; Jiysis minim kuyip ak ma diy, Jayras nup anggak, "Ma pirikninin; yip nep gos ninimin anggak."

³⁷ Pen biynimb gok kuyip, kun okok angay, Piyta ak, Jemis ak, Jemis numam Jon ak kuyipyakam nep ponind amnak.

³⁸ Jayras korip ak amjakiy ninjak: biynimb kilpul angying, siy angying gi mindeyak. Ninjy korip mingan biyan amiy anggak, "Yenen kilpul angying, siy angying gispim?"

³⁹ Pañ ak ma kumimb; yikop wisin kinjap anggak."

⁴⁰ Kun anggek, nup sik angeyak, kuyip ang mis yokiy, pañ nop nonim ber ak diy, binuk kaw ak diy, ponind pañ ak kumek, korip niluk mingan dayey mindek biyan amiy,

⁴¹ ñin kind nup ak diy, Jiwda minim angiy anggak, "Taliyta kawim anggak." Minim anggak kiñin kun ak mey, "Paskoy! Nip aspiyn; tikjakan anggak."

⁴² Anggek, pañ kun ak simiy nuk onep wimangan amnak ak mey, tikjakiy aran apyan gakniñ, biyn-

imb gok wal yimb angyak.

⁴³ Kun geyak, Jiysis minim kilis angyi angak, “Gipiyn kun ak biynimb gok kuyip misen ma angninimb angak.” Kun angying angak, “Pañ anup keñmangyi gunap ñem ñinjan angak.”

6

Nasaret Biynimb Jiysis Nup Ma Diyak

(Mat 13:53-58; Luk 4:16-30)

¹ Jiysis binuk gok poñind miñmon kun ak kirgiy, miñmon nuk Nasaret amnak.

²⁻³ Am mindiy Jiwdas lotiw ñin ak apek, nan-gep korip ak amiy, biynimb kuñay ap mindeyak gok kuyip minim angnakniñ, niñiy wal angyi angyak, “Bi kun biy kapenda miñmon biy nimb nep; Mariya ñinuk bap. Numam nuk Jemis, Josis, Jiwdas, Saymon sek, nunay nuk gok sek yip mindpun biy. Pen minim kun ak akay nimb niñiy angyi? Tap mageprek yergiy gip?” Kun angyi, nup ma diyak.

⁴ Pen Jiysis kuyip angak, “Bi Gor minim angye gok, miñmon wikan gunap giranget, biyomb chin angyi dipay ak pen; biynimb korip miñmon kiyk key gok, minim kuyip ak ma dipay angak.”

⁵ Nup gosimb ma niñyak kun ak, tap mageprek gunap ginimun rek ma ayak. Biynimb tap gak gunap nep dininek sun ayak.

⁶ Pen Nasaret biynimb nup, Gor Ñinuk yimb angyi gos ak ma niñyak, nuk wal yimb angak.

Binuk Onep Wimingan Ak Wong Yip Ginimimb Angyi Angyokak

(Mat 10:5-15; Luk 9:1-6)

Jiysis pen korip miñmon kun okok tanğyığ, biynimb gok kuyip Gor minim ak anğñak.

⁷ Ñin bap binuk onep wimiňan ak suk anğek apey anğak, “Bi omiňal ak key, bi omiňal ak key miñmon okok keykey amiy, minim anğñinimimb. Yand nimbip anğyoksiyiyn rek, minim anğñi tanğyığ, kichekiy malñiluk tap gok anğ mis yokniň, anğyokniňgambim anğak.”

⁸ Minim bap pen anğak “Amniň; tap ñiňemb, maniy, wand sikoy, tap gok dand ma amnimimb; yir kondim anep dand amnimimb.

⁹ Tomb tirup ay amnimimb ak pen, tiňgliys nokom bap nep ay amnimimb, gunap sek dand ma amnimimb.

¹⁰ Korip bap amem nimbip anğdeniňgiy, korip kun anep mindiy, amniň ginimimb ñin anep amnimimb.

¹¹ Miñmon bap amjakem nimbip ma anğdiy, minim nimbip ak ma niňeniňgiy, miñmon kun ak kiring amniň, niňyan anğiy, tomb silkul pikem yapek amnimimb anğak.”

¹² Anğek, kiyk miñmon sikoy keykey amiy, biynimb gok kuyip minim anğñiyiň anğyak, “Tap siy tap timey gipim gok, Gor nup yenen kun gipun anğiy, kirginimimb anğyak.”

¹³ Kun anğiy, biynimb kichekiy malñiluk amban ay mindek gok, kichekiy malñiluk anğ mis yokiy, biynimb tap gak gok wel ayñey jak amniyak.

Jon Nup Kuňam Tikey Kumak

(Mat 14:1-12; Luk 3:19-20; Luk 9:7-9)

¹⁴ Pen Jiysis gak rek, minim ak miñmon okok kind kind amek, kiyň Herot kunep niňak. Biyn-

imb gok, minim kun ak anġ amiy apiy giyinq, gunap anġyak, “Jon bi ñinq pikñemb kumek komyak ak, tip tikjakiy mey, ap tap mageprek kun gok gisap anġyak.”

¹⁵ Gunap anġyak, “Bi kun ak binak Yilayja; bi sinok nind apek, Jiwda Kiyñ yomb key yimb kisen wininqamb apay ak anġyak.” Gunap anġyak, “Bi Gor minim anġep wosrey mindyinqipay rek bap ap mindip anġyak.”

¹⁶ Pen kiyñ Herot nuk niñiy anġak, “Ak Jon bi ñinq pikñemb nind kuñam tiknik anep tikjakiy, ap kun gisap anġak.”

¹⁷⁻¹⁹ Yenen, nind Herot, numam Piyliyp biynuk Herodiyas nup dek, Jon anġak ak timey gip anġek, Herodiyas Jon nup miluk niñiy anġek, Herot binuk gunap anġyokek, am Jon nup dand apiy, kalambis ayak. Biyn Herodiyas, Jon nup pikayin anġiy gos niñak ak pen;

²⁰ Jon tap timey ma giyinqip; minim nuk yerip yerip anġek Herot niñiy, minim tep, yipund giy nep anġip anġiy, pirikiy biyn Herodiyas nup yaw anġnimun rek ma ayek,

²¹ Jon nup yergiy pikaynim anġiy, gos okok nep niñmindyinqip. Mind mind minek bap, Herot nonim nup tikak ñin ak apek, tap yomb ñiñning, gapman biyomb gok, amiybi yomb gok, biyomb miñmon Galiyliy nimb gok suk anġek, tap yomb ñiñning wiyak.

²² Ap tap ñiñyakniñ, Herodiyas panuk ap deniys gek, biyomb ap mindeyak gok sek, Herot sek niñey kuyip tep gek, Herot pañ kun anup anġak, “Gipan kun ak tap yerip anġniñeniñgamban nip

ñiningayn.

²³ Pen miñmon yomb kond mindpiyn ak angniney, nip day ak angen kond mindeningamban angak.”

²⁴ Kun angek, pañ ak am nonim Herodiyas nup tap yerip ak angninim angek angak, “Jon bi ñing pikñemb jun won nup ak angnimin angak.”

²⁵ Angek, panuk kasek kiyn Herot mindek ak amiy angak, “Yep won biy nep, Jon bi ñing pikñemb kuñam ak tikiy, jun won nup ak di piler ar ay, dap yip ñey niñiy mey; pisnep kumimb angyi niñnim angak.”

²⁶⁻²⁸ Kun angek, kiyn Herot Jon nup niñek simb timey gak ak pen, nuk biyomb gok niñmindey pañ anup, tap yerip yip angniney ñiningayn angak rek niñiy, amiybi nuk bap angyokek, am Jon nup jun won ak timbrikiy, di piler ar ay dand apiy, pañ kun ak nup ñek, nuk dand amiy, nonim nup ñak.

²⁹ Pen Jon binuk gok, nup kuñam tikiyak ak angey niñiy, am mumbwak dand apiy, kamb miñgan ak komyak.

Jiysis Biynimb Kuñaynep Tap Keñmangiy Ñek Ñiñyak

(Mat 14:13-21; Luk 9:10-17; Jon 6:1-13)

³⁰ Jiysis binuk gok andkind apiy, biynimb gok kuyip minim angñiyiñg yerer giyak gok, Jiysis nup angñiyak.

³¹ Pen biynimb kuñay yimb nep amiy apiy geyak, Jiysis binuk gok yip tap niñningiy rek ma ayek, kuyip angak, “Chin biynimb ma mindpay namb okok amiy, yikop mindenjun angak.”

32-34 Kun angyi, binuk gok yip bot diy amniyakniņ, biynimb miñmon kun okok Jiysis amjap angyi, ñiņg gol ar kinjeņ par ak nind amiy, Jiysis binuk gok yip amniņg geyak okok, nind am mindeyak. Jiysis amjakiy kuyip niņek, kiyk kanj siypsiyp bi kond mindep bap ma mindip rek ak mindeyak. Kun ak niņek simb gek, kuyip minim gunap tapin anğni mindek.

35 Pumb paņind amnakniņ, binuk gok apiy nup angyak, “Pumb saņind amimb. Akniy miñmon nep namb okok nen,

36 biynimb guniy angyokey, miñmon korip yep maņ akniy amiy, tap keñmaņgiy kiyk gunap taw ñiņyaņ angyak.”

37 Angeyak angak, “Nimb key kuyip keñmaņgiy ñinimimb angak.” Angek angyak, “Kun apan ak, chin maniy yir anep tiņgawip piskind ak dand amiy, keñmaņgiy taw dand apiy kuyip ñinjun?”

38 Angey, Jiysis angak, “Biret nimb yerip yerip mindip am niņim angak.” Angek am niņiy angyak, “Biret onep mamind ak, piys omiņal sek mindip angyak.”

39 Kun angeyak angak, “Biyimb guniy angem, asik bum keykey ay, tap kaskas ar akniy bisgey amnaņ angak.”

40 Angek, kuyip angeyak, gunap piyptiy rek bum giyak; gunap wan handret rek bum giyak.

41 Pen Jiysis biret kaw ak sek, piys omiņal ak sek diy, kiyongiy niņiy, Gor nup tep angyi, biret ak tipaņg binuk gok kuyip ñek, kiyk biynimb gok kuyip bilok ñiyak. Piys omiņal ak kunep ñek, biynimb gok kuyip bilok ñiyak.

⁴² Ñeyak, ñimb gey gey kuyip tapin ayak.

⁴³ Tap day day kirgiyak gok, Jiysis binuk gok wand diy ying gey gey, wand onep wimingan ak arachakak.

⁴⁴ Tap ñinyak ñin kun ak bi gok nep mey, payp tawsin amnak.

Jiysis Ñing Kas Ar Ak Tawind Amnak

⁴⁵ Pen Jiysis binuk gok kuyip angek, bot diy Betsayda kind bindoñ amniyakniñ, biynimb gok kuyip key angyokek amniyak.

⁴⁶ Angyokiy, nuk miñmon yirik bap amiy, Gor nup angnin mindek.

⁴⁷⁻⁴⁸ Kisyim wining gak won ak, Jiysis nep mindiy niñak: Binuk gok bot diy ñing namb sinbindoñ amniyakniñ, yingen ak ameyak okok ken apek, kosyam ñing kas pikrikying amniyak. Miñmon turgum tikak won ak, nuk ñing kas ar ak amiy, kuyip tawsak ay amning gek,

⁴⁹ nup angninyak-eñ chip kawnan angyiy, pirikiy kumb gawil giyak.

⁵⁰ Kun giy pirikeyak, Jiysis kuyip angak, “Ma piriknimimb! Yand nep aswiyn! Gos yomb ma niñnimimb angak.”

⁵¹ Angyiy, bot mingan amek, pinim dek ak kirgagak. Kun gek, yergiy kun gip angyiy, gos kuñay yimb niñyak.

⁵² Biret diy biynimb kuñaynep bilok ñak ak niñyak ak pen, gos kuyip pikñiñak rek, Gor Ñinuk ak mey kun gip angyiy ma niñyak.

Jiysis Gek Biynimb Tap Gak Gok Sun Ayak

⁵³ Pen ñing namb ak am am miñmon Genesaret amjakiy, bot ak tiwning ayak.

⁵⁴ Bot ak kiring amniyakniņ, biynimb kun okok Jiysis owip anġey niņiy,

⁵⁵ kasek miñmon kind kind amiy, biynimb tap gak gok kuyip dand Jiysis am mindek okok amniyak.

⁵⁶ Ñin kun gok Jiysis miñmon yikop akan, dawin yomb okok amjakek, biynimb tap gak gok kuyip dap maker namb ak ay anġyak, “Nand mindey biynimb tap gip gok, chech day nip okok nep di niņey, kuyip suņ ayaņ anġyak.” Kun anġeyak, nuk minim kuyip ak diy niņmindakniņ, biynimb nup diniņyak gok suņ ayak.

7

Yergek Asiņ Mindeniņgambun

¹ Bi Peresiy gunap, bi low tiysa gunap Jerusalem nimb ap mindiy niņyak:

² Jiysis binuk gunap nusind nupis sikop asikrep giy, tap ñimbyiņgipay rek ma giyak.

³⁻⁴ Peresiy biynimb gok diy, Jiwda biynimb gok maņgiysek, nusind nupis sikop anġyiņgipay rek niņiy, monmon ma giy; ñin ñiņg ay gilunġ yokiy nep tap ñimbay. Biynimb Jiwda mer gok mindipay namb ak amiy, kunep ñin ñiņg ay gilunġ yokiy nep tap ñimbay. Pen tiyn, piler, kap tap okok kunep kilrimey gipay.

⁵ Kun ak Jiysis binuk gok yikop ñiņyak kun ak niņiy, bi Peresiy gok sek, bi low tiysa gok sek nup anġyak, “Bi nand gok yenen, basind apis sikop anġyak rek ma gipay?”

⁶ Angeyak, Jiysis angak, “Asaya nimbip bi minim nep apim gok, ninind yimb angyi Baybol buk ak tikiy angak,

‘Biyimb guniy Gor Biyomb chin; Gor Biyomb chin apay ak pen, kiyk yikop minim anep apay; yip gosimb ma ninbay.

⁷ Gor minim tep ak angñispun angyi, biynimb apay minim anep angñimbay angak.’

⁸ Nimb Gor nup minim ak kirgiy, biynimb minim apay ak dun angyi, nap nasind sikop angyingipay ar ak kindik gipim angak.”

⁹ Jiysis kuyip tip ak angyi angak, “Nimb Gor minim angyi ak kirgiy, minim nimbik key anep apim.

¹⁰⁻¹¹ Mosis minim bap tikiy angak, ‘Nap nanim minim angnimir rek ninidiy, kuyip direp ginimimb. Pen ñapan gunap nop nonim kuyip minim timey angeningiy, pikayem kumningiy angak.’ Pen nimb yenen minim kun ak rek ma angñimbim. Biynimb gunap nop nonim kuyip kirgining, tap kuyip ñimbinup rek ak, Gor nup angyi aypun angye,

¹² ‘Ak angrep gispim apim.’

¹³ Gipim kun ak, Gor nup minim ak kirgiy, nap nasind sikop giyingipay miñ ar ak nep gem amimb angak.”

*Tap Biynimb Gek Gach Gip Gok
(Mat 15:10-20)*

¹⁴ Jiysis kun angyi, biynimb gok kuyip angek mindek kiñiñ sñak apey angak, “Minim angning gispiyn ak ninjiy, ninrep ginimimb.

15 Tap ñimbey namb biyañ amningamb ak gach ma mindeningamb; namb biyañ nimb mis winingamb anep mey, gach mindeningamb.

16 Nimb biynimb gos timund sek mindenimimb gok, timund ay niñrep ginimimb angak.”

17 Jiysis kun angiy, biynimb gok kuyip kirgiy korip miñgan amek, binuk gok nup angyak, “Minim paydon ay apan kun ak, kiñiñ nuk ak yerip?”

18 Angey angak, “Kiyk ma niñbay rek, nimb kunep ma niñbim? Tap asikpay gok, monmon ñimbey koñgiy namb biyañ amek, Gor niñek gach ma mindeningamb.

19 Yenen: tap ñimbay kun gok gosimb niñbay namb biyañ ma amningamb; koñgiy namb biyañ nep amek, simb sek kiy yokningambay angak.” Jiysis minim angak kun ak, tap okok mañgiysek ñiñemb nep; asikep gunap ma mindip angak.

20 Pen Jiysis angak, gos timey namb kuyip akyañ nimb apek mey; timey gey Gor niñek minim mindip.

21 Biynimb gok namb kuyip biyañ gos timey awakniñ, timey giy, tap siy diy, chip ñangiy, biyn siy bi siy giy,

22 timey nep giy, minim timey angiy, tap gok yip rek mindembikop angiy, miluk niñiy, biynimb angjiwi, monmon giy, yimb key dand araniy timey gep gos nokom niñiy gipay.

23 Tap timey gipay kun gok key okok nimb ma wip, gos timey ak namb kiyk biyañ nimb apamb timey gambay mey, gach mindip.

Biyn Bap Pañ Yip Ak Gek Suñ Ayningamb Angiy

*Ninjak**(Mat 15:21-28)*

²⁴ Jiysis Galiyliy kirgiy, am miñmon Taya mañ okok amnak. Amiy, biynimb gok yip miñiy ma niñningiy angiy, korip miñgan bap am weying mindek ak pen; weygiy mindonimuj rek ma ayak.

²⁵⁻²⁶ Biyn bap, panuk nup kichekiy abañ ayak ak mey, Jiysis wip angey niñiy, am mindek kiñin siñak jun pañgiy angak, “Pañ yip kichekiy abañ ayip ak, gey mis amnañ angak.” Biyn kun ak nuk Jiwda mer bap. Nup tikyak miñmon Siyriya; dawin yomb nuk mey Poniysiya.

²⁷ Pen kun angek, Jiysis nup tikdam ay angak, “Keñmangiy ñapan chin gok ñemb ak di kayn mokon, timey giniñgamb angak.”

²⁸ Angek, biyn ak pen angak, “Biyomb! Ak tep apan ak pen, ñapan gok tap ñimbey, day day gok nep boñg molik okok yapek, kayn ñiluk gok ñimbay sek angak.”

²⁹ Angek, Jiysis minim kun ak niñiy angak, “Nand kun apan ak, pañ nand kichekiy molik sikiy mindamb ak, gambiyn mis amimb nen amnin angak.”

³⁰ Angek, andkind amiy ninjak: kichekiy kiring mis amek, panuk minj ar ak kapkap kin mindek.

Bi Timund Pilgak Bap Jiysis Gek Timund Pangyikak

³¹ Jiysis miñmon Taya kun ak kirgiy, am miñmon Saydon amiy, miñmon Dekapoliys namb okok amiy, Galiyliy chemb amnak.

³² Amjakakniņ, biynimb gok bi timund pilgiy minim anġrep ma giyiņgip bap dand apiy, Jiysis nup anġyak, “Bi biy nup diniņey suņ ayaņ anġyak.”

³³ Anġeyak, Jiysis bi kun anup poņind keykey siņak amiy, ñin maņgiy par ak timund miņġan nup ak yokiy, ñin maņgiy kuñik giy alemb nup ak diniņyiņġ,

³⁴ kuyonġiy niņiy, miker gakniņ, “Epata” anġak. Epata anġak minim kiñiņ kun ak “Paņgyikan anġak.”

³⁵ Kun anġakniņ, bi kun ak timund miņġan ak paņgyikiy, alemb awan amnakniņ, day minim yipund giy anġak.

³⁶ Anġakniņ, Jiysis kuyip minim kun ak biynimb okok ma anġñinimimb anġak ak pen, kiyk amiy biynimb kuņaynep anġñiyak.

³⁷ Minim kun ak anġñey niņiy, wal anġiy anġyak, “Jiysis tap okok maņgiysek, biyomb ak apiy giniņġamb anġyak rek nep gip. Biynimb timund pilgip gok gek niņrep gipay, biynimb alemb miker gip gok gek, minim anġrep gipay anġyak.”

8

Jiysis Bi Kuņaynep Tap Keñmaņgiy Ñak (Mat 15:32-39)

¹ Ñin namb kun siņak nep biynimb kuņaynep ap mindey, keñmaņgiy ma mindek, Jiysis binuk gok suk anġgek apey anġgak,

² “Yand biynimb guniy kuyip simb niņsipiyn. Ñin ominal nokom yand yip mindiy, yikop mindpay.

³ Kuyip yiwan nep angyoken, gunap paryomb okok nimb opay rek, kinjeņnamb okok amiy, windin mayn apek milokningambay angak.”

⁴ Angek, binuk gok angyak, “Miñmon nep namb akniy, keñmanġiy akay nimb diy ñinjun?”

⁵ Anġey, Jiysis angak, “Biret nimb yerip yerip mindip?” Angek, “Onep ar ak angyak.”

⁶ Kun anġey, Jiysis biynimb gok kuyip anġek bisġiyakniņ, biret onep ar kun ak diy, Gor nup tep anġiy, tipanġiy binuk gok kuyip ñek, kiyk diyiņġ biynimb gok kuyip bilok ñiyak.

⁷ Piys sikoy kaw bap di mindeyak ak sek ñey, Gor nup tep anġiy ñek, bilok ñiyak.

⁸⁻¹⁰ Ñey, ñimbey ñimbey kuyip ġiy anġakniņ, Jiysis binuk gok wand onep ar ak diy, day day mindek gok yiņġey arachakak.

Bi tap ñiņyak kun gok, pow tawsin rek. Jiysis pen, biynimb kun gok kuyip anġyokiy, binuk gok yip bot diy, miñmon Dalmaniwra amniyak.

Peresiy Gunap, Tap Mageprek Ak ġey Niņun Anġyak

(Mat 16:1-4; Luk 12:54-56)

¹¹ Bi Peresiy gunap Jiysis nup nembnemb gon yerip rek anġnimuņ anġiy, ap nuk yip minim anġ amiy apiy ġiy anġyak, “Tap mageprek bap semb biyoņ nimb ġey, chin niņun anġyak.”

¹² Kun anġey, nup yiruk ġakniņ anġak, “Biynimb miñiy mindpay ñin biy, yenen apay, “Tap mageprek semb biyoņ nimb bap ġey niņun apay?”

Yand nimbip niñind yimb aspiyn. Gor nimbip tap mageprek kun ak rek bap ma gek niñningambim angak.”

¹³ Kun angyi, kuyip kirgiy, binuk gok yip ñiñg tikiy kind bindon amniñg, bot diy sanđiyak.

Jiysis Yiys Minim Paydon Ay Angyiñg, Peresiy Minim Kuyip Ak Ma Dinimimb Angak
(Mat 16:5-12)

¹⁴ Pen binuk gok sakiy giy, biret kuñay mer: nokom bap dand amniyak.

¹⁵ Namb okok amyiñg, Jiysis kuyip angak, “Peresiy yiys kiyk ak sek, Herot yiys nuk ak sek ma ñiñnimimb angak.”

¹⁶ Kun angek, binuk gok kiyk key angnin angnin giy angyak “Biret gunap sek ma dowpun rek asap angyak.”

¹⁷ Jiysis pen, kiyk angyak kun ak key niñiy angak, “Yenen, biret dand ma owpun angyi as-pim? Nimbip gos tep mayak ak mey, niñrep ma gipim?”

¹⁸ Windin ayak ak ma niñbim? Pen timund ayak ak ma niñbim? Akan niñiy sakiy gipim.

¹⁹ Bi payp tawsin mindeyak ñin ak, biret onep mamind ak di tipañ ñenik, ñimbiy kirgiyak gok, wand yerip yerip yingpik?” Angek, “Wand anep wimiñgan ak yingnuk angyak.”

²⁰ Kun angeyak angak, “Pen bi pow tawsin mindeyak ñin ak, biret anep ar ak di tipañ ñen, ñimbiy day day kirgiyak gok wand yerip yerip yipik?” Angek angyak, “Wand onep ar ak yingnuk angyak.”

²¹ Angey angak, “Pen nimb gos kun ak ma ninjiy sakiy gipim?”

²² Pen kiyk miñmon Betsayda kind bindonj amjakyakniñ, biynimb gunap bi windin koy gak bap dand apiy, Jiysis nup angyak, “Nup diniñan angyak.”

²³ Angeyak, Jiysis bi windin koy kun anup ñin kind ak diy, poñind gol okok amiy, windin nup ak kuñik giñiy, nup diniñiy angak, “Tap gunap niñsipan akan angek,”

²⁴ “Yaw. Biynimb gok niñsipiyn ak pen, mon bind rek gok giraspay angak.”

²⁵ Angek, Jiysis tip ak windin manjiy nup ak diniñek, day tap okok manjiyseke niñkind yimb angak.

²⁶ Pen Jiysis bi kun anup angak, “Tip ak and-kind biynimb mindpay bindonj ma amninin; korig nak yipund giy amninin angak.”

Piyta Angak, “Nand Gor Ñinuk Krays Nep Angak”

(Mat 16:13-20; Luk 9:18-21)

²⁷ Jiysis binuk gok yip miñmon Siysariya Piyliyap amning sanjiyak. Kinjenamb okok amying kuyip angak, “Biynimb gok, yip an anjiy niñbay?”

²⁸ Angek angyak, “Biynimb gunap nip Jon bi ñing pikñemb ak apay; gunap Yilayja apay; gunap bi Gor minim angep bap apay angyak.”

²⁹ Angeyak, Jiysis kuyip angak, “Nimb pen yip an anjiy niñbim?”

Angek, Piyta angak, “Nand nep mey, Jiwda Kiyñ yomb key yimb per kond mindyinjipun ak nep anjiy niñbun angak.”

³⁰ Angek, Jiysis angak, “Biynimb okok kuyip minim kun ak ma angnimimb angak.”

Jiysis Angak, “Yand Kumiy Tip Tikjakningayn Angak”

(Mat 16:21-28; Luk 9:22-27)

³¹ Jiysis pen, binuk gok kuyip minim angniying angak, “Bi bap Ninuk yiwur yomb yimb dningamb. Biyomb minim tungasikep gok sek, biyomb Gor nup simbongep gok sek, bi low tiysa gok sek nup miluk ninjy pikayeningambay kumiy, nin ominjal nokom mindiy, tip ak tikjakningamb angak.”

³² Jiysis minim kun ak misen angek, Piyta nup dand gol okok amiy, anğ giying angak, “Minim kun ak rek ma angnimin. Nip kun ak rek ma giningiy angak.”

³³ Jiysis tungandikiy binuk gok kuyip ninjy, Piyta nup angak, “Seytan! Key okok amnon! Gor gos nimb rek ma aspan; biynimb gos key ninbay rek ninjy aspan angak.”

³⁴ Kun angyi, binuk gok sek, biynimb kunaynep ap mindeyak gok sek suk angek, kiñin sinjak apeyak angak, “Biynimb yip ker mindning giningiy gok; tap yerip man ar biy gos ninbay ak kirgiy, pumbnamb kisyimken yip kisen giy, miker yomb dep akan, kumemb gos ak sakiy giy, yip nep chingiy tangeningiy.

³⁵ Biynimb Jiysis nup diy mindon, tep ma giningamb angyi ninningambay gok; pisnep apyap pikningambay. Pen biynimb Jiysis nup diy, minim tep nup diy mindon, chinup timey

giniᅇgambay ak minim ma mindip aᅇgiy gey am-
niᅇgamb gok; Gor gek perper mindeniᅇgambay.

³⁶ “Pen nimb tap man ar biy dun aᅇgiy
gem amek, gos yomb nimbik ak ar kun anep
ameniᅇgamb; perper mindenimimb rek ma
ayniᅇgamb.

³⁷ Akaᅇ, tap yerip rek Gor nup yomem, nuk pen
nimbip gek perper mindeniᅇgambim.

³⁸ Kun ak, biynimb an biynimb tap siy tap
timey gipay namb ak mindyiᅇg, nambiᅇ ginimuᅇ
rek ayek niᅇiy, Jiysis nup gosimb ma niᅇbun
aᅇgniᅇgambay ak, kisen kuyip simb giniᅇgamb.
Yenen: Bi bap Niᅇuk Nop aᅇgek, enjol melik
tep gok sek wiᅇniᅇgamb niᅇin ak, Nop nuk anup
aᅇgniᅇgamb, ‘Biynimb kun gok yand ma niᅇbiyn
aᅇgniᅇgamb aᅇgak.’ ”

9

¹ Pen Jiysis kun aᅇgiy, minim bap aᅇgak,
“Minim aspiyn biy niᅇrep ginimimb! Nimb biyn-
imb mindpim guniy gunap kim mindpikniᅇ, Gor
biynimb diy kond mindeniᅇgamb niᅇin ak, Jiᅇwda
Kiᅇyᅇ yomb key yimb ak, yimb yomb sek apek
niᅇniᅇgambim aᅇgak.”

Jiysis Mumbwak Nup Ak Key Yimb Ayak
(*Mat 17:1-12; Luk 9:28-36*)

² Pen kisen niᅇin oneᅇ kaᅇgol ak mindiy, Jiysis
gak: Piᅇyta ak, Jemis ak, Jon ak kuyip yakam
poᅇind, miᅇmon dum yiy akyoᅇ bap amniyak.
Amiy, Jiysis nup niᅇey mumbwak nup ak key
yimb ayak.

³ Chech nuk ak tundrimey yimb giy, ñiñakol yimb gak. Pen biynimb man ar biy bap chech gunap wasyim gey, tund kun ak rek, aynimuj rek ma ayip.

⁴ Pen won kun ak niñyak; Mosis yip Yilayja yip ap, Jiysis yip minim anjerik.

⁵ Kiyk niñiy, Piya Jiysis nup angak, “Tiya. Chin tep yimb ap biy mindpun! Kun ak chin korip bandak band ominal nokom ginjun; nip bap, Mosis nup bap, Yilayja nup bap angak.”

⁶ Kiyk yakam pirikyak rek, Piya angnim kun angyi niñrep giy mer, monmon kun angak.

⁷ Pen semb ak ap kuyip yiw gaksiñ, minim bap semb namb kun ak angak, “Ak Ñi mapin yand yimb. Minim angnimuj rek niñnimimb angak.”

⁸ Kun angakniñ, kiyk niñkuskus giy niñyak, bi ominal kun ak ma minderik; Jiysis nep mindek.

⁹ Pen dum biyon kirgiy, apyapying, Jiysis angak, “Dum biy apambun tap gamb niñbim ak, miñiy biynimb gunap kuyip ma angninimimb. Kisen Bi bap Ñinuk kumiy tikjakek, misen angninimimb angak.”

¹⁰ Angek, kiyk minim kun ak niñind angyip angyi, biynimb gunap kuyip ma angniyak, kiyk keynep angnin angnin giy angyak, “Kumiy tikjakningayn angyip minim kiñin ak yerip?”

¹¹ Kun angyi, Jiysis nup angninij angyak, “Bi low tiya gok yenen apay, Yilayja nind apek, kisen bi kiyn yomb key yimb ak winingamb apay?”

¹² Angeyak, Jiysis angak, “Niñind apay. Baybol buk ak tikiy angyak, ‘Bi Yilayja nind apiy angek, biynimb gok minj moka giy mindyakniñ, Bi bap

Ñinuk ak kisen winiᅅgamb aᅅgyak.’ Pen biynimb gok Bi bap Ñinuk nup ma diy, yiwur yomb ñiniᅅgambay aᅅgyak minim ak, nimb ma niᅅbim?

¹³ Pen bi Yilayja aᅅgyak kun ak, kisen winiᅅgamb aᅅgiy gos ak ma niᅅnimimb. Nup nind tikey yomb giy, minim aᅅᅅakniᅅ nup timey yimb giyak. Kun ak Baybol buk ak tikiy, giniᅅgambay aᅅgyak rek nep gak aᅅgak.”

*Ñiskoy Kichekiy Ambaᅅ Ayak Bap, Jiysis Gek Ñiyimb Ayak
(Mat 17:14-21; Luk 9:37-43)*

¹⁴ Pen kiyk biyaᅅ amiᅅ niᅅyak; bi low tiysa gunap, Jiysis binuk onep anjip gok yip penpen aᅅ mindyakniᅅ, biynimb kuᅅaynep ap kuyip piᅅiy kuskus gi mindeyak.

¹⁵ Kun giy niᅅmindyakniᅅ, Jiysis apchakek jiw di giy, am nup wasiw aᅅᅅgiyak.

¹⁶ Jiysis binuk gok kuyip aᅅᅅniᅅiy aᅅgak, “Yenen pen aᅅgek pen aᅅgek gispim?”

¹⁷⁻¹⁸ Kun aᅅgakniᅅ, bi bap biynimb mindeyak namb kun ak nimb aᅅgak, “Tiysa. Ñiyand ak kichekiy abaᅅ ayek, minim ma aᅅgip. Ñin gunap nup tapin gek, apyap pikiy, meᅅᅅ sipyimiᅅ, kosimb asimᅅ apiᅅ, ñin tomb yindgiy giᅅ. Per kun gek gek mey, dand opiᅅn ak pen; binak gok kuyip aᅅᅅen, kichekiy ak aᅅgyok merniᅅ kirpay aᅅgak.”

¹⁹ Kun aᅅgek, Jiysis kuyip aᅅgak, “Nimb biynimb miᅅniᅅ mindpim ar biy, Gor nup gosimb ma niᅅbim. Ñin akay nup gosimb niᅅiy, tap kun gok key giniᅅgambim? Minim per aᅅᅅen niᅅbim ak,

yerkiy minim kilsek angen niñningambim? Ñi kun ak dand mindpiyn biy wim angak.”

²⁰ Angek, dand mindek kiñiñ sinjak apey, kichekiy ñi kun anup abañ ayak ak, Jiysis nup niñiy, ñi anup gek apyap pikiy, andik mandik gakniñ, kosimb asimbi apiy amnak.

²¹ Kun gek, Jiysis ñi kun ak nop nup angniniy angak, “Tap kun ak, ñin akay rek gak?” Angek angak, “Wosrey ñiskoy miñg gak.

²² Kichekiy kun ak, nup per pikayin angiy, mon yinimb namb okok sek, ñiñg namb okok sek diyokip. “Kun ak chirupapiy simbi niñiy, tap kun ak angyokep rek ayek, angyokan angak.”

²³ Angek, Jiysis angak, “Yenen angyokep rek ayek, angyokninin aspan; yand tap okok mangiysek ginim anep mindip. Nand nep mey, yip angninbiyn rek giniñgamb angiy niñey mey, apan rek giniñgayn angak.”

²⁴ Angek angak, “Kun giniñgamban angiy gos ak niñbiyn ak pen, gos omiñal niñnim rek ayip ak, yip gos tep yimb ñinimin angak.”

²⁵ Pen biynimb kuñaynep ap nan-giyakniñ, Jiysis kichekiy anup angak, “Nand bi biynimb gey timund pil giy, minim ma apay ak, nip aspiyn: ñi anup pisnep kiring amninin angak.”

²⁶ Angek, kichekiy kun ak wal angiy, ñi anup gek apyap pikiy, jep di di wosgek, kumimb angyak.

²⁷ Kun angyak ak pen, Jiysis nup di jakñak.

²⁸ Kisen Jiysis korip miñgan amiy, binuk gok yip, kiyk nep mindyñg, nup angyak, “Yenen chin kichekiy kun anup angyok mer niñbun?”

²⁹ Angeyak angak, “Kichekiy kun ak rek yikop ma angyokpay; Gor nup angniñey mey, ang mis yokningamb angak.”

Jiysis Kumningayn Angiy Tip Ak Angak
(*Mat 17:22-23; Luk 9:43-45*)

³⁰ Jiysis binuk gok poñind miñmon kun ak kir-giy, Kapaniyam amning, san diyak. Galiyliy namb okok amying, binuk gok kuyip minim angñirep ginim angiy, kapkap weying mindying, kuyip angñiyingip.

³¹ Angñiy angyingip, “Bi bap Ñinuk nup pikayey kumiy, ñin ominjal nokom mindiy, tip ak tik-jakningamb angyingip.”

³² Nuk angakniñ, minim kiñiñ kun ak yerip angip angiy, nup angniñningiy ak pen; jel gek ma angniñyingipay.

Yand Nep Biyomb Mindpiyn Angiy Penpen Angyak
(*Mat 18:1-5; Luk 9:46-48*)

³³⁻³⁴ Pen kinjeñnamb okok amying binuk gok, nimb mer yand nep biyomb mindpiyn angying, penpen angey amnak. Am Kapaniyam amjakiy, korip miñgan ak amiy, Jiysis kuyip angniñiy angak, “Nimb kinjeñnamb okok apying, minim yerip angem apamb?” Angek, minim kun ak angey awak ak niñiy, pen ma angñiyak.

³⁵ Ma angñeyak, Jiysis am bisgiy kuyip angek apeyak angak, “Biynimb yomb mindning giningiy gok, biynimb yikop wong giñimbay rek gok mindiy, biynimb gunap kuyip wong giñiningiy angak.”

³⁶ Kun angyiy, ñapan sikoy bap dap mindeyak namb sinjak ay, kaygiyng angak,

³⁷ “Biynimb yip gosimb niñiy, ñapan sikoy biy rek direp giniñgambay gok, kuyip nep mer, yip sek diniñgambay. Pen yip diniñgambay ak, yip nep mer, Biyomb yip angyokek winik ak nup sek diniñgambay angak.”

Ak Bunjiy Chin Nep Angak

(Luk 9:49-50)

³⁸ Pen Jon Jiysis nup angak, “Tiysa. Chin niñnuk: bi bap yimb nip ak angyiy, kichekiy malñiluk anğ mis yokek niñiy angnuk, ‘Nand bi chin yip jimñiy ma tapun ak, kun ma ginimin angnuk.’ ”

³⁹ Angek, Jiysis nup angak, “Nup yenen mer apim? Bi yip gosimb niñiy, tap mageprek gunap giniñgambay gok, kisen andikiy yip minim timey ma angniniñgambay.

⁴⁰ Biynimb chinup miluk ma niñbay gok, biynimb chin mindiy mey; chinup miluk ma niñbay.

⁴¹ Pen niñim! Biynimb nimbip Jiysis binuk angyiy, ñiñg malñey ñiñningambim gok, Gor kuyip direp giniñgamb angak.”

Timey Ginjun Rek Ayip Anjiy Mindrep Ginimimb

(Mat 18:6-9; Luk 17:1-2)

⁴² “Pen biynimb gunap, biynimb yip gos kilis giy ma niñbay bap gey apyap pikniñgamb ak, timey yimb giniñgambay. Kuyip nind tiwning dam ñiñg yokpiyap ak girep gipyap. Yenen: kim mindiy timey giniñgambay kun ak, yiwur yomb diniñgambay angak.”

43 Kun anġiy anġak, “Ñin maġiy ak tap siy tap timey giniġ gonimuġ, piŝkind kun ak timbrik yokem; piŝkind anep mindonimuġ. Kun ak yiwur tap ak pen; sikoy won bap nep giniġgamb. Pen tap siy tap timey ma giniġgambim rek, kim amniġgambim. Mer ak: miñmon Hel, mon yin nep mindip ak amniġgambim.

44 Miñmon kun ak kuyip kisow pernep ay mindyġ, mon yin nep mindeniġgamb.

45 “Tomb kind bap timey giniġ gonimuġ, piŝkind kun ak timbrik yokem; piŝkind anep mindonimuġ. Kun ak yiwur tap ak pen; sikoy won bap nep giniġgamb. Pen tap siy tap timey ma giniġgambim rek, kim amniġgambim. Pen tomb omiġal giy mindek, timey gem, nimbip anġ Hel yokek yiwur yomb diniġgambim.

46 Miñmon kun ak kuyip kisow pernep ay mindyġ, mon yin nep mindeniġgamb.

47 “Pen windin maġiy ak gek, tap siy tap timey gep rek ayonimuġ, windin piŝkind kun ak tuġġjiwyoknimimb. Kun giy kapkap mindrep giy, Gor nimbip diy kond mindonimuġ rek ayip. Pen omiġal giy mindek, tap siy tap timey gem nimbip miñmon Hel anġyokek, yiwur yomb diniġgambim.

48 Miñmon kun ak kuyip kisow pernep ay mindyġ, mon yin nep mindeniġgamb.

49 “Gor biynimb maġiysek yip gosimb niġniġiy anġiy, kuyip miker gunap ñiniġgamb.

50 “Sol tap yindik tep yimb ak pen, yindik nuk ak amek, yergiy gem tip ak yindik giniġgamb? Kun ak, nimb biynimb yindik gok kapkap aw anġiy mindenimimb anġak.”

10

Biyn Angyokep Akan Mer Angyak (Mat 19:1-12; Luk 16:18)

¹ Jiysis Kapaniyam kirgiy, Jiwdiya miñmon namb okok amiy, am Joden ñiñg tikiy, pis bindon amnak. Amek, biynimb gok niñiy, ap nan-geyak, nuk per giyñgip rek kuyip minim anğñak.

² Bi Peresiy gok Jiysis yerip rek anğningamb angyiy, mindek ak apiy, anğniñiy angyak, “Bi gok biyn diy, angyokniñg angyokniñgambay akan, yerip gos niñban?”

³ Anğeyak, Jiysis anğak, “Mosis minim yerip angyiy tikak?”

⁴ Anğek angyak “Mosis anğak, ‘Biyn angyokniñg; nip angyoksiyiñ angyiy, nup ñiwkil band bap tikñiy angyoknimuñ anğak’ angyak.”

⁵ Anğeyak, Jiysis anğak, “Minim anğñey kasek ma dipim rek, Mosis minim kun ak tikak.

⁶ Pen Gor miñmon alwol gayak ñin ak, bi gay biyn gay gak.

⁷ Ar kun ak mey, bi gok nop nonim sikop yip mindiy, biyn diyiñg kuyip kirgiy,

⁸ kiykber jimñiy kiner mumbwak nokom ayip. Gor anğek mumbwak nokom yimb ayniñgamb kun ak,

⁹ bi gunap tikjakiy, kuyip anğ tunğasik keykey ma ayniñgiy anğak.”

¹⁰ Kun angyiy, binuk gok yip tip ak korip miñgan biyan amiy,

¹¹ nup minim kun ak tip anğniñeyak anğak, “Bi gok biyn diy angyokiy, biyn kisenimb diniñgambay ak, tap siy tap timey giniñgambay.

12 Pen biyn gok kunep bi diy kirgiy, bi kisenimb diniᅅgambay ak, tap siy tap timey giniᅅgambay aᅅgak.”

*Jiysis Ñapan Sikoy Gok Kuyip Ñin Jun Ar Ayak
(Mat 19:13-15; Luk 18:15-17)*

13 Biynimb gunap, Jiysis ñapan chinup gok bilesiyᅅ maᅅ aᅅgiy, dand apey, binuk gok kuyip aᅅ geyak,

14 Jiysis kuyip pen aᅅ giy aᅅgak, “Ñapan sikoy gok kirgem yip ker wiyaᅅ. Gor biynimb nuk diyn aᅅgiy niᅅimb mey kun gok rek.

15 Biynimb yomb gok, ñapan ᅅaᅅ Gor ker opay rek ma apeniᅅgambay, kuyip ma diniᅅgamb. Nimbip niᅅind yimb aspiyn aᅅgak.”

16 Kun aᅅgiy, ñapan ᅅaᅅ gok kuyip kaygiy, ñin jun ar ay aᅅgak, “Gor nimbip kond mindonimun aᅅgak.”

*Bi Tap Kuᅅay Mindek Bap
(Mat 19:16-22; Luk 18:18-23)*

17 Pen Jiysis amnakniᅅ, bi bap puᅅgrikind aᅅgiy amek kiᅅniᅅ siᅅak koᅅgim yimiy aᅅgak, “Tiysa tep yimb! Yand yerer gen, Gor gek perper mindeniᅅgayn?”

18 Aᅅgek, Jiysis aᅅgak, “Yip yenen tiysa tep yimb apañ? Biynimb bap tep yimb ma mindpay; Gor nokom mey bi tep yimb mindip.

19 Pen nand niᅅban: Gor low anep wanjrem biyoᅅ aᅅgiy, ‘Chip ma ñaᅅgnimimb; biyn siy bi siy ma ginimimb; tap siy ma dinimimb; yesek ma aᅅgnimimb; yesek yesek aᅅgyiᅅ biynimb gunap

tap gok ma taw piling dinimimb; nap nanim angnimiyr rek ninimimb anqip' angak."

²⁰ Kun angek, bi kun ak Jiysis nup angak, "Tiysa. Yand ñiskoy ming tikiy, low kun gok ninying mindpiyn angak."

²¹ Angek, Jiysis nup wasemb ay angak, "Tap nokom bap nep ma gipan. Amiy, tap nand yerip yerip mindip gok yokiy maniy diy, biynimb tap ma mindip gok kuyip ñinimin. Kun giy mey, mindrep gep nand ak mindeningamb Gor miñmon biyon. Apiyn rek giy apiy, yand yip tanjonjur angak."

²² Kun angek, bi kun ak tap nuk kuñay mindek rek, simb gek gos par yimb aying amnak.

²³ Jiysis binuk gok kuyip niniskus giy angak, "Biynimb tap kuñay mindeningamb gok kosyam yimb Gor biynimb nuk mindey, kuyip diy kond mindeningamb angak."

²⁴ Kun angek, gos kuñaynep nineyak, kuyip tip ak angak, "Ñapan yand guniy. Gor biynimb nuk mindning, kosyam yimb biynimb nuk mindeningambay!

²⁵ Kanj kamel gok ñiw lekpay mingan ak anning, kasek amningiy rek ayingamb; biynimb maniy tap kuñay mindip gok, kosyam yimb Gor nup gosimb niney, kuyip diy kond mindeningamb angak."

²⁶ Kun angek, binuk gok wal yimb angyi, pen angninek pen angninek giy angyak, "Kun ak Gor biynimb yerip rek gok diy kond mindeningamb angyak."

²⁷ Angeyak, Jiysis kuyip niñyng angak, “Biynimb gok key giniñgiy rek ma ayip; Gor nep mey yerer giniñg, ginimun rek nep mindip angak.”

²⁸ Pen Piyta Jiysis nup angak “Niñan! Chin nand yip tanğniñg, tap chin gok mañgiyseki kirpun angak.”

²⁹⁻³⁰ Angek angak, “Biynimb yip gosimb niñiy, minim tep woñg ak giniñg: korip miñmon kiyk kirgiy akan, numam nunay kiyk kirgiy akan, nop nonim kiyk kirgiy akan, ñapan kiyk gok kirgiy akan, tap woñg kiyk gok kirgiy tanğeniñgambay ak; Gor kuyip direp yimb giniñgamb. Kuyip kond mindek lum ar biy mindeniñgambay ñin ak, nop, nonim, numam, nunay, ñapan, korip, tap kiyk gok kuñay yimb mindeniñgamb. Pen ñin gunap biynimb yikop gok, yip ker mindipay rek niñiy kuyip timey giniñgambay. Pen kisen Gor kuyip dand miñmon nuk amek, pernep mindeniñgambay.

³¹ Biynimb kuñaynep miñiy mindrep gipay gok, kisen mindrep ma giniñgambay; biynimb kuñaynep miñiy kosyam mindipay gok, kisen mindrep giniñgambay angak.”

Jiysis Kumiy, Tikjakningayn Angiy Tip Ak Angak (Mat 20:17-19; Luk 18:31-34)

³² Pen kiyk Jerusalem amyñg, Jiysis nind gak; binuk gok kisen giy gospar ayñg amniyakniñ, biynimb kisen giy apeyak gok niñiy pirikyak. Jiysis pen, binuk onep wimiñgan ak kuyip poñind gol siñak amiy, tap nup yerip giniñgamb ak kuyip angñak.

³³ Anğñiyiñg anğak, “Niñim; Jerusalem amon, Bi bap Ñinuk nup dam biyomb Gor nup sim-bonğep gok sek, bi low tiysa gok sek kuyip ñeningambay, nup kor giy ñanğbirik ayep anğiy, di bi Jiwda mer gok kuyip ñey,

³⁴ nup anğjiwiw, kiñuk giy, miñ diy pikiy, dam pisnep pikayeniñgambay kumniñgamb. Pen ñin omiñal nokom mindiy, tip ak tikjakniñgamb anğak.”

*Jemis Yip Jon Yip Biyomb Mindniñg Gos Niñrik
(Mat 20:20-28)*

³⁵ Sebediy ñinuk Jemis yip, Jon yip ñin bap ap Jiysis nup anğrik, “Tiysa. Chirmiñay nip minim bap anğniñniñg gispur anğrik.”

³⁶ Kun anğerik, Jiysis anğak, “Yip anğniñniñg gispiyr kun ak, niriñ yerginim?”

³⁷ Anğek anğrik, “Kisen nand Biyomb yimb mindiy, miñmon mañgiyseñ kond mindeniñgamban ñin ak, chirupmiñay bi kond mindep anğiy, bap ñin yipund kind okok ken, bap ñin anğind kind okok ken mindonjur anğrik.”

³⁸ Kun anğer, Jiysis nuk yiwur diniñgamb rek anğiy anğak, “Nirmiñay niñrep giy ma aspiyr. Niñg silik yand ñiñniñgayn ak nirmiñay kunep niñniñgayr? Miker yand diniñgayn ak kunep diniñgayr?”

³⁹ Anğek, “Yaw anğrik.” Anğerik, Jiysis anğak, “Niñind apiyr ak pen;

⁴⁰ ñin yipund kind ak an mindeniñgamb, ñin anğind kind ak an mindeniñgamb ak yand ma anğniñgayn; ak Bapiy tap nuk; nuk key niñimb rek giniñgamb anğak.”

⁴¹ Pen Jiysis binuk onep wanjrem ak minim kun ak niñiy, Jemis yip, Jon yip kuyip kuñay angning geyak,

⁴² Jiysis kuyip mañgiysek angek apey angak, “Nimb niñbim: miñmon okok, biyomb yimb gok biyomb namb kayañ gok kuyip kond mindey, biyomb namb kayañ biyomb kayañ gok kuyip kond mindey, kiy pen biynimb gok kuyip kond mindpay.

⁴³ Pen nimb kun ak rek ma ginimimb. Bi nimb bap biyomb mindning ginimuñ ak, biynimb gok kuyip wong giñnimuñ.

⁴⁴ Pen biyomb yimb mindning ginimuñ ak, biynimb gok kuyip monmon yimb wong giñnimuñ.

⁴⁵ Bi bap Ñinuk kunep, yip wong giñniyañ angyi lum biy ma awak; biynimb Gor nup kirpay gok kuyip nen kumiy, di Gor yip jimñiy ayin angyi owak angak.”

*Jiysis Bi Windin Koy Gak Bap Gek Windin Niñak
(Mat 20:29-34; Luk 18:35-43)*

⁴⁶ Jiysis binuk gok yip miñmon Jeriykow kirgiy amning, biynimb kuñaynep yip amniyak. Bi Timiyas ñinuk Batiymeyas windin koy gek, kinjen gol siñak bising mindyng, maniy tap gok nen asimb anğ mindek.

⁴⁷ Anğ mindakniñ, Jiysis bi Nasaret nimb asaw angey niñiy, nuk suk angyi angak, “Jiysis, Depiyt Ñinuk. Yip simb niñan angak!”

⁴⁸ Angek, biynimb gok nup anğ giy angyak, “Ma anğan! Kapkap mindey angyak.” Kun angyak

ak pen, nuk kapkap ma mindek, suk yomb angyi angak, “Depiyt Ñinuk yip simb niñan angak.”

⁴⁹ Angek, Jiysis man kun sinak apiy angak, “Nup angem awañ.” Angek, biynimb gok bi windin koy anup angyak, “Jiysis nip asap nen; tikjakiy gos sek winimin angyak.”

⁵⁰ Angeyak, chech parsek nuk ak tungasik yokiy, Jiysis mindek ak kasek amnak.

⁵¹ Amek, Jiysis nup angak, “Yip yergañ angyi aswan?” Angek angak, “Tiysa. Windin ak tip niñiyn angyi aswiyn angak.”

⁵² Angek, Jiysis angak, “Tep. Yip gek suñ ayniñgamb angyi gos niñban rek, suñ ayip nen, amnoñ angak.” Kun angakniñ, day windin yimb niñiy, Jiysis yip amnak.

11

Jiysis Nup Piñiy Kuskus Giy Jerusalem Amniyak (Mat 21:1-11; Luk 19:28-40; Jon 12:12-19)

¹ Jiysis binuk gok yip am am Jerusalem man man giyiñg, Oliyp dum amiy, miñmon Betpasiy sek, Beteniy sek amjakiy, Jiysis binuk omiñal nind angyokiy angak,

² “Miñmon wikan bindoñ amiy niñningayr: kanj dongiy marip biynimb ma dand tapay bap tiwning ayey mindeniñgamb. Niñiy, wisik dand winimiyr.

³ Biynimb gunap nirip yenen kun gispiyr angeniñgiy angnimiyr ‘Biyomb ak wonj bap giy, tip ak yokek winiñgamb angnimiyr’ angak.”

⁴ Kun angek, amiy niḡrik: donḡiy marip ak, korip kinjenrumb gol siḡak tiwning ayey mindek. Wisik girikniḡ,

⁵ Biynimb yep maḡ kun okok mindeyak gok angyak, “Yergining, donḡiy marip kun ak wisik-sipiyr?”

⁶ Angeyak, Jiysis anḡak rek anḡerik, yaw anḡey,

⁷ donḡiy marip kun ak dand Jiysis mindek ak apiy, chech paryomb kiyk ar biyoḡ ayrik gok tunḡasikiy, di donḡiy ar ayerik, Jiysis ar kun ak bisgak.

⁸ Biynimb gok: gunap chech parsek kiyk gok tunḡasik kinjenram ar ak ayiḡ; gunap tap kas gok tipaḡ dap ayiḡ, nup di namb ay,

⁹ biynimb gunap nind giyak, gunap kisen giy, suk yomb anḡyiḡ angyak,

¹⁰ “Gor nup yimb dand aranḡun! Biyomb chinup yokip biy, kond mindrep ginimuḡ! Basind Depiyt kiyḡ mindiy biynimb kond mindyiḡgip rek chinup giniḡgamb! Gor nup tep yimb aspun angyak.”

¹¹ Jiysis kun giy Jerusalem amiy, Gor nup anḡniḡep korip miḡgan ak amiy, tap okok niḡraḡakniḡ, pumb paḡind amek niḡiy, binuk onep wimiḡgan ak yip andkind Beteniy amniyak.

*Mon Niḡemb Bind Bab Maḡgiy Ma Piyak
(Mat 21:18-19)*

¹² Minek pen, Beteniy nimb andkind kinjenrumb okok apyiḡ, Jiysis nup yiwan gek,

¹³ par chim niḡak; mon kiyaw bind bab mindek. Maḡgiy gunap piy mindip akan anḡiy amiy niḡak;

ma piyak. Yenen: maŋgiy nuk piyep ñin ak ma awak.

¹⁴ Kun gek, Jiysis aŋgak, “Mon bind kun gip ak, kisen ma piyek ñiŋningambay aŋgak.” Kun aŋgek, binuk gok maŋgiysek niŋyak.

Bi Lotiw Korip Sikyim Geyak Gok Jiysis Angyokak

(Mat 21:12-17; Luk 19:45-48; Jon 2:13-22)

¹⁵ Jiysis binuk gok poŋind Jerusalem amiy, Gor aŋgniŋep korip miŋgan biyaŋ amiy niŋak: biynimb gok sikyim giyiŋg, maniy seniys giyiŋg gi mindeyak. Kun geyak, maniy seniys giyiŋg, yakir dap ayey tawyiŋg gi mindeyak boŋg ar gok tungandikiy, biynimb sikyim giyiŋg tap tawyiŋg gi mindeyak gok maŋgiysek yuk mis yokak.

¹⁶ Yuk yokiy aŋgak, “Kisen biynimb bap, tap gu-nap dand Gor aŋgniŋep korip kamb wariy kusgiy mindip namb biy ma pandiknimimb aŋgak.”

¹⁷ Kun angyiŋg aŋgak, “Baybol buk ak tikiy angyak, ‘Gor aŋgip “Korip yand ak biynimb miñmon okok maŋgiysek ap yip aŋgniŋningambay aŋgip” angyak.’ Pen nimb kun gem, bi tap siy diy weyiŋg mindpay korip bap rek ayip aŋgak.’ ”

¹⁸ Kun aŋgek, bi low tiysa gok sek, bi lotiw korip kond mindep gok sek nup pikayun aŋgiy niŋyak ak pen; biynimb maŋgiysek minim nup niŋyak rek, nup yergiy pikayjun aŋgiy gos gunap niŋyak.

¹⁹ Dungep won ak, Jiysis binuk gok yip Jerusalem kirgiy Beteniy amniyak.

Gor Nup Gos Nokom Niŋiy Angniŋem, Angniŋgambim Rek Giniŋgamb

(Mat 21:20-22)

20-21 Minek kiyk andkind kinjenamb okok apiy, Piyta angak, “Tiysa. Niñan! Kiyaw bind kisen ma piyek ñiñningambay angnak biy, pisnep milip giyowip angak.”

22-23 Angek, Jiysis angak, “Biynimb an miñmon yirik akan, tap bap kuyip kinjen tikonimuñ, Gor nep gek keykey sinbindon amningamb angiy, nup angniñey, angningambay rek giningamb. Pen giningamb akan ma giningamb angiy gos niñningambim ak, ma giningamb.

24 Gor giningamb angiy, gos nokom niñiy angniñem, angningambim rek giningamb.

25 Pen nup angniñning, biynimb minim mindip gok kuyip niñiy kirgem mey, Nap semb biyon mindip ak, tap siy tap timey nimb gipim gok, pen kunep niñiy kirginingamb.

26 Kun ma geningambim, nimb pen gipim gok niñiy ma kirginingamb angak.”

Nip An Angek Kun Girapan

(Mat 21:23-27; Luk 20:1-8)

27 Pen Jiysis binuk gok yip Jerusalem apchakiy, Gor angniñep korip miñgan ak girangakniñ, bi Gor nup simbonjep yomb gok sek, low tiysa gok sek, bi minim tungasikep gok sek Jiysis mindek ak apiy angyak,

28 “Nip an kun ginimin angek, girapan?”

29 Angeyak angak, “Yand nimbip minim bap angniñen, yip pen angñeningambim mey, yip an angek girapiyn ak angñiningayn!

30 Jon biynimb gok kuyip ñiñ pikñak ak, Gor angek pikñak akan, gos nuk key niñiy pikñak? Yip angñem niñiyn angak.”

³¹ Kun angek, kiyk key angnin angnin giy angyak, “Chin angningambun: Gor angek biynimb gok kuyip ning piknak angon, yenen minim nup ak ma dipim angningamb;

³² pen Jon gos nuk key ninij gak angon, biynimb guniy, Gor angek wong nup giñiyngip angyi ninbay rek, Gor nup anjjiwsipay angyi, chinup kamb silok pikayningambay angyak.”

³³ Gos kun ak ninij, “Chin ma ninbun angyak.” Kun angeyak, Jiysis kuyip angak, “Nimb yip ma angnimbim rek, yip an angek girapiyn ak nimbip pen ma angniningayn angak.”

12

*Jiwda Kay Gor Nup Bi Wong Giñimbay Gok Kuyip, Timey Nep Gipay Angak
(Mat 21:33-46; Luk 20:9-19)*

¹ Pen Jiysis kuyip paydon ay angak, “Bi bap wariy giy, miñ wayn wong ak gi yimiy, wayn mangiy piksimbjakep angyi, kiwok bap gayrep giningamb. Biynimb ap miñ mangiy siy diningambay ak ninmindenjun angyi, korip kiyongiy paryomb bap giy, bi gunap kuyip angningamb, ‘Nimb miñ wong yip ak kond mindiy, kisen pik gek, yip gunap, nimb gunap dinimimb angyi,’ miñmon paryomb okok anningamb.

² Wayn mangiy pik giningamb nin ak, binuk bap angyokiy angningamb, ‘Wayn mangiy yip gunap ñey dand winimin angningamb.’

³ Angek amjakek, bi wong giningambay gok nup di pik pik ay, yikop nep angyokningambay.

⁴ Kun gey, bi wayn wong nop nimb ak, bi bap pen angyokningamb. Amjakek, nup jun biyon pikiy, timey yimb giningambay.

⁵ Kun gey, bi wayn wong nop nimb ak, bi bap pen yokek amek, nup pisnep pikayningambay. Kun anep giying; gunap gamb pikningambay, gunap pisnep pikayningambay.

⁶ Kun gey gey, bi wong nop nimb ak binuk bap ma mindeningamb; ñi mapin nuk nokom mindeningamb ak, minim nup ak diningambay angyi angyokek amningamb.

⁷ Pen amjakakniñ, biynimb wayn wong gi mindeningambay gok niñiy angingambay, ‘Ñi wip biy, bi wayn wong nop nimb ak ñinuk wip. Nup pikay mey, tap nuk dinimuñ rek gok chin diningambun angingambay.

⁸ Kun angyi, nup pisnep pikay, dam mis okok diyokningambay.

⁹ Kun geningambay, bi wayn wong nop nimb ak apiy yerginingamb? Nuk apiy, biynimb wayn wong geningambay kun gok kuyip pikay, biynimb gunap kuyip angek, wayn wong kun ak kond mindeningambay angak.’”

¹⁰ Kun angyi, kuyip angak, “Baybol buk tikiy angyak,

‘Bi korip gep gok kamb par kirgiyak ak, miñiy korip sap namb yan ak piñiyñiy mindip.

¹¹ Biyomb chin kun gak ak, tep yimb gak angyak’ angak.”

¹² Jiysis kun angek, bi low tiysa gok sek, Gor nup tap simbongep yomb gok sek chinup nep asap

angiy, nup chichiy dun angyak ak pen, biynimb gok kuyip pirikiy, kirgiyak.

*Takes Ñemb Akan Ma Ñemb Angyak
(Mat 22:15-22; Luk 20:20-26)*

¹³ Pen kisen bi Peresiy gunap, Herot binuk gunap kuyip angyak, “Nimb Jiysis mindip amiy, nup minim gunap angninem, nuk yerip angek, nup dam kalambis ayningambun angyak.”

¹⁴ Kun angeyak, Jiysis mindek ak amiy angyak, “Tiysa. Chin niñbun: nand bi niñind yimb nep apan. Biyomb yimb gok sek, biynimb yikop gok sek kuyip niñiy ma pirikpan. Gor anqip rek nep niñiy, biynimb okok kuyip yipund giy nep angnimban. Kun ak chinup angnan! Chin Jiwda biynimb low gok yergiy mindip: gapman biyomb Rom nimb anup takes pikep akan ma pikep?”

¹⁵ Angeyak, Jiysis minim yesek angyak kun ak niñiy angak, “Yip yenen minim yesek kun ak angnimbim? Maniy mangiy takes pikpim bap dapem yand niñiy angak.”

¹⁶ Angek, dap ñey niñiy angak, “Maniy bak ak, an jomluk ak sek, yimb ak sek mindip?” Angek angyak, “Biyomb Siysa mindip.”

¹⁷ Angeyak, Jiysis angak, “Siysa yip ginimimb anqip gok, nup ginimimb; Gor yip ginimimb angiy niñimb gok, nup ginimimb angak.” Angek niñiy, minim yesek angyak kun ak silgirep gak rek, wal yimb angyak.

*Biynimb Kumiy Tikjakpay
(Mat 22:23-33; Luk 20:27-40)*

18 Sanjiwsiy biynimb gok, biynimb kumiy ma tikjakpay angyi ninjingipay rek, gunap Jiysis mindek ak apiy angyak,

19 “Tiysa, Mosis, minim bap chinup tikiy angak, ‘Bi bap biyn diy, ñapan tikiy mer, yikop kumeningamb, numam nuk bap pen biyn kanil kun ak diy, mam kumak ak ñapan nup angyi tikningamb.

20 Kun ak bi kiñin sek onep ar ak mindeningambay. Numam nind biyn diy, ñapan tikiy mer, yikop kumek,

21 numam namb pen biyn kun ak diy, kunep ñapan tikiy mer, yikop kumningamb. Kun gek, numam ak pen diningamb. Ak kunep ñapan tikiy mer, yikop kumningamb.

22 Kun gi dam dam numam onep ar ak ñapan tikiy mer, mangiysek yikop kumeningambay, kisen biyn ak kunep kumningamb. Pen biynimb kumiy tikjakningambay apan ak,

23 biyn nokom binuk di onep ar ayak kun ak, kisen numam akay yip mindeningamb?’ ”

24 Angeyak, Jiysis angak, “Nimb Baybol buk minim tikyak ak ma ninbim rek, ninind ma ninbim.

25 Biynimb kumbay gok tikjakningambay ñin ak, Gor enjol nuk gok mindipay rek mindiy, biyn gok bi ma dey, bi gok kunep biyn ma diningambay.

26 Pen biynimb tip ma tikjakningambay apim ak, Mosis mon sikoy bind yin nep mindek kesim tikak ak, angyi ma ninbim rek ayip. Gor mon yinek namb ak mindiy, Mosis nup angak ‘Ebra-

ham, Aysek, Jekop Gor kiyk mey, yand mindpiyn angak.' Kun ak yenen, basind sikop nind kumyak gok kuyip, Gor kiyk mindpiyn angak? Pen nimb apim rek, biynimb gok pisnep kumbiyap ak,

²⁷ Gor kiyk mindpiyn angiy ma apkop. Biynimb kim mindpay akan kumbay ak, Gor niñimb manjiysek kim mindpay. Nimb niñrep ma gipim rek, pisnep kumbay angiy niñbim angak.”

*Gor Low Minim Yomb Yimb Angak Ak
(Mat 22:34-40; Luk 10:25-28)*

²⁸ Bi low tiysa bap, Jiysis Sanjiwsiy biynimb gok kuyip angrep gak ak niñiy, ap nup angniñiy angak, “Low ar akay yomb yimb?”

²⁹ Angek, Jiysis angak, “Low yomb yimb ak, Baybol buk ak tikiy angyak: ‘Yisrel biynimb niñim! Biyomb chin Gor nep Biyomb yimb mindip.

³⁰ Nup wasemb yimb ay, gos timund may may nimb ak manjiysek nup ker amnimun angyak.’

³¹ Minim yomb yimb bap mey; ‘Biynimb gunap kuyip, nimb key wasemb yimb aypim rek, wasemb aynimimb angyak.’ Low okok manjiysek, low yomb yimb mey omiñal kun ak angak.”

³² Angek, bi low tiysa ak angak, “Tiysa, nand niñind yimb apan. Gor nokom mey, Biyomb yimb mindip. Nuk rek gunap ma mindpay.

³³ Chin Gor nup tap pik dam pisnep ñiningambun akan, yergiy simbong ñiningambun ak tap yikop; pen gos timund may may chin ak manjiysek nup ker amek, nup wasemb yimb ay,

biynimb gunap kuyip wasemb ayniᅅgambun ak, tap yomb yimb aᅅgak.”

³⁴ Kun aᅅgek, Jiysis bi ak niᅅrep yimb giy aᅅgip aᅅgiy, nup aᅅgak, ‘Nand Gor binuk kond mindeniᅅgamb bap, mindniᅅg gispan rek ayip aᅅgak.’ Pen Jiysis minim niᅅind yimb gok nep aᅅgek niᅅiy, biynimb gok kisen minim yesek okok nimb, nup nembnemb giy aᅅgiᅅgipay rek tip ma aᅅgyak.

Krays An?

(Mat 22:41-46; Luk 20:41-44)

³⁵ Jiysis kisen Gor aᅅgniᅅep korip ak mindiy, biynimb gok kuyip aᅅgak, “Bi low tiysa nim-bik gok yenen apay, ‘Depiyt tikek tik dand amiy, Biyomb chinup kond mindeniᅅgamb bap tikniᅅgambay apay?’

³⁶ Pen Gor Kawnan ak nup gos ñek, Depiyt key tikiy aᅅgak,

‘Gor Biyomb yip anup aᅅgak, “Nand ñin yipund kind yand okok ken mindiy, biynimb ñaᅅgep nand gok kuyip tomb beᅅ nip okok ayen, kond mindeniᅅgamban aᅅgak.” ’

³⁷ Kun ak, Depiyt Kiyᅅ yomb key yimb ak nup, Biyomb yand aᅅgak. Pen Ñinuk nup nep yergiy Biyomb yand apkop? Yikop nep kun ma apkop ak pen; Kiyᅅ yomb key yimb ak, Gor Ñinuk aᅅgiy niᅅiy mey, Biyomb yand aᅅgak.” Jiysis minim kiᅅniᅅ aᅅgrop gak rek, biynimb gok minim nup ak miᅅmiᅅ yimb giyiᅅg niᅅyak.

Bi Low Tiysa Gok Sisker Giyak

(Mat 23:1-36; Luk 11:37-54; 20:4)

38-39 Jiysis biynimb gok kuyip minim anğñiyiŋ anğak, “Niŋrep ginimimb. Bi low tiysa gok miñ kiyk ak, chech paryomb gok ay, biynimb ap nan-gipay tip ak akan, lotiw gipay namb ak amon, biynimb gok aswim-ey anğey, yimb chinup yiy ar biyon minden anğiy niŋbay. Tap yomb ñimbay ñin ak kunep, biynimb windin yirik ar ak bisgon, chinup niŋey, yimb chinup yiy ar biyon minden anğiy niŋbay.

40 Pen biyn kaŋil korip tap kuyip gok siy diy, Gor nup minim paryomb yesek nep gok anğniŋbay. Gipay kun ak, yiwur yomb yimb diniŋgambay anğak.”

*Biyn Kaŋil Bap Gor Nup Opriyŋ Yokak
(Luk 21:1-4)*

41-42 Jiysis Gor anğniŋep korip opriyŋ dayiŋgipay maŋ siŋak biŋiŋ mindiy niŋak: biynimb maniy kuŋay mindek gok, maniy kuŋaynep dap yokyak. Pen biyn kaŋil maniy ma mindek bap, maniy likañsek sikoy omiŋal dap yokek niŋiy,

43-44 binuk gok kuyip anğek apeyak anğak, “Niŋim! Biyn kaŋil biy, biynimb gunap kuyip wiyniyŋ giy, opriyŋ yomb yimb ak Gor nup yokip. Biynimb maniy kuŋay mindip gok, maniy kiyk gunap sek mindakniŋ, opriyŋ dap yokpay; biyn kaŋil biy, maniy nuk won omiŋal mindamb anep dap yokip; nuk tap taw ñiŋnimuŋ bap ma mindip. Kun ak Gor niŋek, biynimb gunap sikoy yokpay; biyn kaŋil ak yomb yimb yokip anğak.”

13

Gor Anḡniḡep Korip Timey Giniḡgamb (*Mat 24:1-2; Luk 21:5-6*)

¹ Jiysis Gor anḡniḡep korip ak kirgiy mis am-nakniḡ, binuk bap nup anḡak, “Tiysa. Kamb tep diy, korip kil tep giyak biy niḡan anḡak.”

² Anḡek, Jiysis anḡak, “Nand kamb korip yomb kun ak niḡey tep gek aspan? Kisen korip kun ak gi timey gey, kamb bap kamb bap ar ak ma mindeniḡgamb; pisnep pipanḡ pikey amdiniḡgamb anḡak.”

Miker Diyiḡ Kosyam Mindeniḡgambay (*Mat 24:3-14; Luk 21:7-19*)

³ Jiysis kun anḡiy, Gor anḡniḡep korip ak kirgiy am Oliyp dum biḡiḡ mindakniḡ; Piyta, Jon, Jemis, Enjriw kiykyakam nep apchakiy anḡyak,

⁴ “Tap anḡgambun gok, ñin akay rek giniḡgamb? Pen yerip rek gek niḡiy anḡniḡgambun, Biyomb anḡak ñin ak, miñiy giniḡ gisap anḡiy niḡniḡgambun?”

⁵⁻⁶ Anḡey, Jiysis kuyip anḡak, “Niḡrep ginimimb! Biynimb kuḡaynep yesek tom giy, yimb yip ak diyiḡ anḡniḡgambay, ‘Yand Jiysis nep aswiyn anḡniḡniḡgambay.’ Kun anḡey, niḡind aspay anḡiy ma niḡnimimb.

⁷ Miñmon akniy penpen gispay, miñmon okok penpen gispay anḡeniḡgiy, gos kuḡay ma niḡnimimb. Tap kun gok rek giniḡgamb ak pen, ñin kisen ak winiḡ gisap anḡiy gos ak ma niḡnimimb.

⁸ Miñmon yomb gunap tikjakiy, miñmon yomb gunap yip penpen ñanḡniḡgambay. Biynimb

wikan gunap tikjakiy, biynimb wikan gunap yip penpen ñaṅṅniṅgambay. Pen miñmon okok maṅgiysek monmon diy, yiwan yomb apiy giniṅgamb. Tap giniṅgamb kun gok, biyn ñapan ñimbamb, maṅ mindip aṅgiy niṅbay rek nep giniṅgamb.

⁹ Pen niṅrep giy mindenimimb. Ñin gunap nimbip dand Jiwda kanjsol mindeniṅgambay ak amey, kor giniṅgambay. Ñin gunap nimbip Jiwda nan-gep korip okok dand amiy, kur diy pikniṅgambay. Ñin gunap Jiysis binuk aṅgiy, dand gapman biyomb mindeniṅgambay ak amey, kor giniṅgambay. Pen dand amniṅgambay rek, minim tep yip ak gapman biyomb gok kuyip aṅṅniṅgambim.

¹⁰ Pen minim tep yip ak aṅṅney, miñmon okok maṅgiysek amek nep, ñin kisen ak winiṅgamb.

¹¹ “Pen nimbip kor giniṅ dand ameniṅgiy, minim yerip diy aṅṅjun aṅgiy, gos kuṅay ma niṅnimimb. Aṅṅniṅ ginimbikniṅ, Gor nimbip gos tep ñek aṅṅniṅgambim. Minim kun ak nimb key ma aṅṅniṅgambim; Gor Kawnan ak nuk aṅṅniṅgamb.

¹² “Pen numam gunap tikjakiy, numam gunap kuyip ñaṅgayan aṅgiy, dam biyomb gok kuyip ñiniṅgambay. Nop gok tikjakiy, ñapan kiyk key gok kuyip ñaṅgayan aṅgiy, dam biyomb gok kuyip ñiniṅgambay. Ñapan gok tikjakiy, nop nonim sikop kuyip miluk niṅiy, ñaṅṅniṅgiy aṅgiy dam ñiniṅgambay.

¹³ Yip ker mindeniṅgambim rek niṅiy, nimbip miluk niṅniṅgambay ak pen; nimb biynimb an

yip ma kirgiy, chingiy nep mindeningambim gok, perper mindeningambim.

Gor Anjñep Korip Ak Timey Yimb Giningambay

(Mat 24:15-28; Luk 21:20-24)

¹⁴ “Tap asikep yimb bap, Gor anjñep korip miñgan ak ayey mindeningamb. Minim tiksipiyn kun biy niñrep ginimimb. Kun gakniñ, biynimb Jiwda propens mindeningiy gok, pirik miñmon yirik okok amningiy;

¹⁵ biynimb korip ar biyon mindeningiy gok, andkind korip miñgan ma amningiy;

¹⁶ biynimb wonğday okok tanğeningiy gok, chech tap gok diniñ, andkind korip ma amningiy.

¹⁷ Biyn ñapan koñgiy mindeningambay gok sek, ñapan tiy ñeningambay gok sek kosyam pirik amningambay.

¹⁸ Tap giningamb kun gok, Gor nup anjñem, yombip aynimuñ ñin ak ma ginimuñ.

¹⁹ Alwol gayak ñin ak tikiy mind dand apiy mindpun ñin biy, timey kun ak rek ma gak; kisen kun ak rek ma giningamb.

²⁰ Ginep mindek, biynimb mañgiysek kumdipyap. Pen Biyomb biynimb nuk diniñ anğayak gok gosimb niñiy, yep won bap nep ginimuñ anğak.

²¹ “Pen ñin kun ak, biynimb gunap anğningambay, ‘Niñim! Jiwda kiyn yomb key yimb ak mindip biy; mindip bindon anğeningiy,’ niñind apay anğiy ma niñnimimb.

22 Biynimb gunap, Gor biynimb nuk anḡayak gok, kind chinup ak winiḡgiy anḡiy anḡniḡgambay, ‘Yand mey, Jiwda kiḡḡ yomb key yimb ak; yand mey bi Gor minim anḡep ak aswiḡn anḡyiḡ,’ yesek tom giḡiḡ, tap mageprek gunap giniḡgambay.

23 Tap yerip yerip kisen giniḡgamb ak, nimbip anḡen niḡbim ak mey; niḡrep giḡiḡ mindenimimb.

Jiḡsis Kisen Andkind Winiḡgamb

(Mat 24:29-31; Luk 21:25-28)

24 “Pen miker yomb kun gok gi tikdakniḡ, pumb ak, gach giḡ, takin ak melik ma giniḡgamb.

25 Gap gok semb biḡoḡ nimb puḡḡjiwyowakniḡ, tap semb biḡoḡ gok, okok nimb okok nimb giniḡgamb.

26 Kun geniḡgamb, Bi bap Ñinuk, Nop anḡek melik yomb gakniḡ, semb band sek winiḡgamb.

27 Pen enjol nuk gok anḡyokeniḡgamb, miñmon kiñiḡ omiḡal ak maḡḡiysek am kus giḡ, biynimb nup ker mindeniḡgambay gok dand mindeniḡgamb ak winiḡgambay.

Mon Silup Ayip

(Mat 24:32-35; Luk 21:29-33)

28 “Nimb niḡbim; mon gok silup ay wos gakniḡ, miñiy pumb aḡniḡ gisap apim.

29 Kun ak rek, miker yomb aspiḡn gok gakniḡ, ‘Miñiy maḡ mindip! Jiḡsis anḡak rek, giniḡ gisap anḡiy niḡniḡgambim.’

30 Apiḡn ak niḡrep ginimimb! Biynimb kiñiḡ miñiy mindpay ar biḡ gunap mindyakniḡ, tap kun gok gek niḡiy kisen kumniḡgambay.

31 Semb ar biyon sek, man ar biy sek kurginingamb; pen minim yand ak perper nep mindeningamb.

*Ñin Akay Winingayn Ak Ma Niñbim Angak
(Mat 24:36-44; Luk 17:26-30, 34-36)*

32 “Ñin akay akan, won akay winingayn ak, biynimb gunap ma niñbay, enjol gok ma niñbay, yand kunep ma niñbiyn. Bapiy Gor, nuk nep niñimb.

33 Kun ak mey, ñin akay winingayn ak ma niñbim rek, niñrep giying mindenimimb.

34 “Winingayn ñin kun ak, biyomb bap korip nuk ak kirgiy wikan bap amning, bi wong gep nuk gok kuyip wong ar keykey angay, binuk kinjenrumb kond mindeningamb anup angningamb, ‘Niñmindenimin angiy amningamb.’

35 Nimbip kun ak rek giningamb. Won akay bi korip nop nimb ak winingamb angiy ma niñbim rek, niñrep giy mindenimimb. Duñgep won ak akan, kisyimnamb yomb biyan akan, pumbnamb akan, sekemb won ak winingamb angiy ma niñbim.

36 Kinimbikniñ kasek winimun rek ayip.

37 Pen nimbip nep ma aspiyn; biynimb okok kuyip mangiysek aspiyn; niñrep yimb giy mindenimimb angak.”

14

*Jiysis Nup Yergiy Pikayjun Angiy Niñyak
(Mat 26:1-5; Luk 22:1-2; Jon 11:45-53)*

1-2 Pen Jiwda biynimb, biret yiys sek ma ñimbay ñin yomb Pasopa apay ak, ñin ominal nep mindakniñ, bi Gor nup simbonjep yomb gok sek, bi low tiysa gok sek Jiysis nup yergiy kapkap chichiy diy, dam ñangayun angyak. Pen gos bap niñiy angyak, Pasopa ñin biy kun gon, biynimb kunaynep guniy, chinup gi timey giningambay angyi kirgiyak.

Biyn Bap Jiysis Nup Wel Ayñak

3 Jiysis miñmon Beteniy amiy, bi Saymon korip ak am bisgiy tap ñiñyak. Bi kun ak, nind soy ayn-dik ayek, Jiysis gek suñ ayak. Pen tap ñiñyakniñ, biyn bap wel kuyrep wak maniy yomb tawpay ak, botol sek dand apiy, namb ak pikpangyi, Jiysis nup jun biyon songak.

4-5 Songek, bi mindeyak kun gok, gunap niñey simbwur kuyip ak timey gek, kiyk key angyak, “Wel kun ak yokiy, maniy yir ñin jiwiy andikiy onep ar ak rek diy, biynimb tap ma mindip gok kuyip ñemb ak pen, yenen kun giy yikop songip?” Kun angyi, nup angyiwyak.

6 Kun angyeyak, Jiysis kuyip angak, “Nup kirgim; yip gip kun ak, girep yimb gip.

7 Biynimb tap ma mindip gok, nimb yip per mindeningambim rek, tap ñining ñinimimb; yand yip per ma mindoningambun.

8 Biyn kun biy tap nuk gep rek ak gip. Kumen wel kuyrep wip ak ayñiy komningambay rek, yip nind ayñisap.

9 Kun ak nimbip niñind yimb aspiyn. Minim tep yip ak miñmon okok angyey amnakniñ, gip kun

ak sek angying, gos nup sakiy ma giningambay angak.”

*Jiwdas Jiysis Nup Ñanryan Angy Mimung Gak
(Mat 26:14-16; Luk 22:3-6)*

¹⁰ Pen Jiysis binuk Jiwdas Yiskariyot, bi Gor nup simbonjep yomb gok kuyip mimung gining amnak.

¹¹ Bi Gor nup simbonjep yomb kun gok, mimung kun ak ninij, tep gek angyak, “Nip maniy gunap ñiningambun angyak.” Angeyak mey, Jiwdas yergiy angen apiy, Jiysis nup dand amniyan angy, gos piyow ninmindek.

*Pasopa Ñin Ak Miñiy Angy Tap Ñinyak
(Mat 26:17-25; Luk 22:7-14, 21-23; Jon 13:21-30)*

¹² Biret yiys sek ma ñimbay ñin yomb Pasopa apay ak apek, kanj siypsiyp ñiluk pikñinemb ñin ak, Jiysis binuk gok nup angyak, “Tap chin ñiningambun gok, wikan akay gayrep ginjun?”

¹³ Angeyak, binuk ominjal angyokiy angak, “Nir miñmon dawin yomb ak amiy ninningayr: bi bap ñing mal dand ameningamb. Nup namb pikiy, korip kun ak amiy,

¹⁴ bi korip nop nimb anup angninij angnimiy, “Tiysa anqip, “Bi yand gok yip tap ñiningambun mingan akay anqip,” angy angnijer’

¹⁵ nirip dam korip ar biyon cheya tap okok mangiysek mindip mingan ak yomningamb. Yomek, tap ñiningambun gok tip kun ak gayrep genimiy angak.”

¹⁶ Kun giy angyokek, miñmon dawin yomb ak amiy angak rek nep mindek mey; Pasopa tap ñiñning giyak ak, gayrep gerik.

¹⁷ Dungep won ak, Jiysis binuk gunap yip am-jakiy,

¹⁸ tap ñimbying angak, “Nimbip niñind yimb aspiyn. Bi chin yip tap jimñiy ñimbsipun biy, bap yip pikayan angyi mimung giningamb angak.”

¹⁹ Kun angek, binuk gok simb gek gos par aying, nup nokom nokom angninying angyak, “Yand mer akan angyi,” angnineyak angak,

²⁰ “Nimb bi yand onep wimingan ak, bap kun giningamb. Bi kun ak mey, yand yip tap diys nokom jimñiy ñimbsipur biy.

²¹ Baybol buk ak tikiy angyak rek kumningayn ak pen, bi yip pikayan angyi, mimung giningamb anup simb niñsiyiyn. Nup ma tikpiyap rek, timey kun ak rek ma giy, yiwur yomb kun ak ma dipkop angak.”

Jiysis Binuk Gok Kuyip Biret Wayn Ñak

(Mat 26:26-30; Luk 22:14-20; 1 Kor 11:23-25)

²² Tap ñimbying Jiysis biret ak diy, Gor nup tep angyi, tipang binuk gok kuyip ñiyiing angak, “Diy ñiñim! Ak mumbwak yand ak nimbip ñispiyn angak.”

²³ Pen ñiing wayn kap ak kunep diy, Gor nup tep angyi, binuk gok kuyip ñek ñinyakniñ angak,

²⁴ “Ñiing biy mey, likañ yand biynimb kuñaynep, kuyip nen yowningamb rek nimbip ñispiyn. Likañ yand yowningamb kun ak mey, biynimb kuñaynep diniingayn angak minim ak wos amningamb angak.”

²⁵ Kun angyiy angak, “Yand nimbip niñind yimb aspiyn. Miñiy ñin biy tikiy ñiñg wayn ma ñiñningayn. Yikop nep minden minden, Gor biyn-imb diy kond mindeniñgamb ñin ak winiñgamb angak.”

²⁶ Kun angyiy, binuk gok yip lotiw kamep bap angyiñg, miñmon Oliyp dum amniyak.

Jiysis Piyta Nup Bi Kun Ak Ma Niñbiyn Anğniñgamban Anğak

(Mat 26:31-35; Luk 22:31-34; Jon 13:36-38)

²⁷ Jiysis angak, “Baybol buk ak tikiy angyak ‘Gor bi kanj siypsiyp mokep anup pikayeniñgamb, kanj siypsiyp gok pirik keykey amniñgambay angak.’ Kun ak rek, mindak nimb mañgiysek yip kirgiy pirik amniñgambim.

²⁸ Pen yand kumiy tikjakiy, miñmon Galiyliy ameniñgayn, nimb kisen niniñgambim angak.”

²⁹ Angek, Piyta angak, “Bi gunap nip kirginiñgiy rek ayip ak pen; yand nip ma kirginiñgayn angak.”

³⁰ Angek, Jiysis angak, “Yand nip niñind aspiyn; kisyimnamb biyañ kakaruk suk omiñal ma anğniñgamb won ak, Jiysis nup ma niñbiyn angyiy, yinj omiñal nokom anğniñgamban angak.”

³¹ Angek, Piyta kilis yimb giy angak, “Yip nip sek pikayniñg pikayniñgiy ak pen; nip ma niñbiyn angyiy ma anğniñgayn angak.” Jiysis binuk gunap, Piyta angak rek nep angyak.

Jiysis Gor Nup Anğniñ Mindek
(Mat 26:36-46; Luk 22:39-46)

³² Jiysis binuk gok yip miñmon Getsemeniy amiy kuyip angak, “Nimb sinbiy bisinğ mindem, yand am Bapiy nup anğniñiy n angak.”

³³ Kun anğiy Piyta, Jemis, Jon kuyip poñind amiy angak,

³⁴ “Mindmanğiy yip piñiyñiy nep aysap ak, kumnim rek ayip. Biy mindiy, niñmindenimimb angak.”

³⁵ Kun anğiy kuyip anğay, nuk yep mañ kun sinak amiy, jomluk ak man biyañ ay, Nop nup anğniñiyinğ angak, “Tap yip giniñğ gisap ak, mer anğiy ker, mer anğninin.

³⁶ Bapiy, nand Biyomb mindpan rek, yerer giniñğ giniñğamban. Tap yip giniñğ gisap ak mer anğniñğ anğniñğamban. Pen gos yand niñbiy n rek ma ginimin, gos nak key niñban ar ak ginimin angak.”

³⁷ Anğiy, andkind binuk omiñal nokom mindeyak ak apiy niñak; pisnep kin ameyak, Saymon Piyta nup angak, “Yenen kinjipan? Tapin won bap niñmindenimin rek ma ayip?

³⁸ Timey ginjun rek ayip anğiy, gos tep niñiy, Gor nup anğniñiyinğ mindenimimb. Gosimb nim-bik ak giniñğ niñimb ak pen, mumbwak anep mawses gip angak.”

³⁹ Kun anğiy, andkind amiy, Nop nup anğniñak rek, tip ak anğniñak.

⁴⁰ Pen andkind apiy niñak, wisin apek pisnep kin amniyak. Niñiy kuyip angak, “Nimb kin-jipim?” Angek siskoy diy, pen anğniñiy rek ma ayak.

⁴¹ Pen kisen amiy andkind apiy, tip ak kineyak

ninji, angak, “Nimb yikop kin mindpim? Mey tep! Bi Gor minim ma ninbay gok yip diniņg asway.

⁴² Biriwin. Niņim! Bi yip mimuņg gip ak yakam lipiņg dand apchakip nen, tikjakem, asway miņgan bindoņ amnun angak.”

Jiysis Nup Chichiy Diyak

(Mat 26:47-56; Luk 22:47-53; Jon 18:3-12)

⁴³ Kun angakniņ, bi low tiysa gok, bi Gor nup simboņgep yomb gok, bi minim tuņgasikep gok angyak rek, binuk Jiwdas Yiskariyot, bi gunap poņind amjakak. Bi poņind owak kun gok, baynat gunap, kur gunap sek diy, nuk yip wiyak.

⁴⁴ Pen maņ maņ giyiņg, Jiwdas bi kun gok kuyip angak, “Bi am kayakol giniņgayn anup, chichiy diy dand kor amnimimb angak.”

⁴⁵ Kun angyi, Jiysis mindek siņak amjakiy, Tiysa angyi, nup kayakol gakniņ,

⁴⁶ bi gunap apiy nup chichiy diyak.

⁴⁷ Kun giyakniņ, Jiysis binuk bap baynat nuk ak lipiņg diy, bi Gor nup simboņgep yomb yimb woņg giņemb anup, timund piskind ak pisnep timbrik yokak.

⁴⁸ Pen Jiysis nup kun giy chichiy deyak angak, “Yand bi tap siy diy minden rek; baynat, yir, tap gok kun giy dapiy yip dispim.

⁴⁹ Per Gor anņniņep korip ak amiy, nimb yip mindiy, biynimb minim anņņimbiyn ak pen, yip ma dipim. Pen miņiy giniņgamb angyi, Baybol buk ak tikiyak rek gispim angak.”

⁵⁰ Pen Jiysis nup kun giy diyakniņ, binuk gok nup kirgiy, maņgiysek pirik amdiyak.

⁵¹⁻⁵² Bi paranj bap, chech parsek nep yimiy, Jiysis nup dand ameyak ak kindik amek, nup kunep chichiy dun angey, chech band nuk ak kirgiy, daynep pirik amnak.

Jiysis Nup Kor Giyak

(Mat 26:57-68; Luk 22:54-55, 63-71; Jon 18:13-14, 19-24)

⁵³ Jiysis nup dand bi Gor nup simbongep yomb yimb korip ak amniyak. Dand ameyak, bi Gor nup simbongep yomb gok diy, bi low tiysa gok diy, bi Jiwda kanjsol yikop gok diy, ap korip kun ak nan-geyak.

⁵⁴ Piyta loslos ay dand amiy, bi Gor nup simbongep yomb yimb korip ak amjakiy, bi korip kun ak wong giyngipay gok yip bisgiy, mon maniy mindeyak.

⁵⁵ Bi Gor nup simbongep yomb gok sek, bi Jiwda kanjsol yikop gok sek Jiysis girangyngip minim kiñij bap diy nup ñangayun angyiy,

⁵⁶ biynimb gunap dand apey, kunaynep yesek tom giyak ak pen; minim kun gok, okok nimb okok nimb angey, nup chingnimuñ rek ma ayak.

⁵⁷⁻⁵⁸ Pen gunap tikjakiy yesek angyiy angyak, “Chin niñmindon nuk angak, ‘Gor angninep korip ñin mangiy diy giyak biy timbrik yokiy, ñin omiñal nokom mindiy, tip ak giniñgayn. Ñin mangiy diy gipay rek ak ma giniñgayn; korip kun ak key yimb bap giniñgayn angyip’ angyak.”

⁵⁹ Minim angyak kun ak kunep niñey sisker yimb ayak.

⁶⁰ Bi Gor nup simbongep yomb yimb ak, biynimb mindeyak namb ak tikjakiy, Jiysis

nup angak, “Minim nip aspay ak pen bap ma angninngamban?”

⁶¹ Angek, Jiysis minim bap pen ma yimb angek, tip ak angninjiy angak, “Nand mey Jiwda kiyn yomb kiyk; Biyomb tep ak Ñinuk yimb?”

⁶² Angek, Jiysis angak, “Yaw. Mey yand nep. Bi bap Ñinuk Nop ñin yipund kind okok ken mindiy, semb band sek apek ninngambim angak.”

⁶³ Kun angek, bi Gor nup simbongep yomb yimb kun ak, yenen Gor nup anjjiwyiing kun asap angyi, chech nuk ak key tungrikiy,

⁶⁴ kuyip angak, “Nuk minim timey asap kun ak yerip gos niñsipim?” Angek, bi Jiwda kanjsol gok mangyisek angyak, “Kun giy anqip rek, nup pikayep angyak.”

⁶⁵ Angyi, bi gunap Jiysis nup kiñuk giy, chech band bap di windin nup ak pik yiwgiy, pikying angyak, “Yand Gor Ñinuk angyi, tap key yimb gipan ak, miñiy nip an piksap ak key ninjiy, chinup angey ninun angyak.” Bi Gor angninjep korip poliys gok kunep nup tapin nep pikyak.

Piyta Yand Jiysis Nup Ma Ninbiyn Angak

(Mat 26:69-75; Luk 22:56-62; Jon 18:15-18, 25-27)

⁶⁶⁻⁶⁷ Piyta am bisgak sinak nep mindakniñ, biyn piñ bi Gor nup simbongep yomb yimb anup wong giyngip bap apchakiy angak, “Nand kunep Jiysis bi Nasaret nimb ak yip mindamban angak.”

⁶⁸ Angek, Piyta angak, “Nak yerip aspan! Minim aspan ak ma ninbiyn angak.” Kun angyi, mis biyan amnakniñ, kakaruk suk angak.

⁶⁹ Biyn kun anep, Piyta nup tip ak ninjy, bi mindeyak gok kuyip angak, “Bi biy kunep Jiysis binuk bap angak.” Angek angak, “Bi kun ak ma ninbiyn angak!”

⁷⁰ Tapin won bap mindiy, bi mindeyak kun gok Piyta nup tip ak angyak, “Nak kunep miñmon Galiyliy nimb ak, chin ninbun: nand bi kiyk bap angyak.”

⁷¹ Angeyak angak, “Biyomb ninmindip; yesek angen yip pikaynimun. Pen ninind yimb apiyn! Bi kun apim ak yand ma ninbiyn angak.”

⁷² Kun angakniñ, kakaruk ak tip suk angek, Jiysis nind kakaruk omiñal suk ma angniñgamb won ak, nup ma ninbiyn angyiy, yinj omiñal nokom angniñgamban angak minim ak niñek, simb gek siy yomb angak.

15

Jiysis Nup Dand Paylat Mindek Amniyak (*Mat 27:1-2, 11-14; Luk 23:1-5; Jon 18:28-38*)

¹ Miñmon yowakniñ, bi Gor nup simbonjep yomb gok diy, bi low tiysa gok diy, bi kanjsol yikop gok diy miytiyñ giy, minim anğ ar nokom ay, Jiysis nup sen ayñiy, dand gapman biyomb Paylat mindek ak amniyak.

² Dand amey, Paylat nup angak, “Nand Jiwda biynimb Kiyñ yomb kiyk key yimb ak akan?” Angek, Jiysis angak, “Mey nak apan ak angak.”

³ Bi Gor nup simbonjep yomb gok, Jiysis nup minim yesek yesek ar gunap angeyak, nuk pen minim bap ma angek,

⁴ Paylat angak “Nip minim kunjay aspay ak, pen minim bap ma angningamban?”

⁵ Angek, Jiysis minim ma yimb angek, Paylat gospar ayak.

Mon Bak Ñangbirik Ayim Angyak

(Mat 27:15-26; Luk 23:13-25; Jon 18:39-19:16)

⁶ Jiwda biynimb ñin yomb kiyk Pasopa apay ak apek niñiy, per am Rom gapman biyomb Paylat nup angniñey, kuyip kalambis bi angniñyingipay anep ang mis yokyinñip.

⁷ Pen simiy kun ak, bi bap yimb nuk Barabas biynimb gunap diy, Rom gapman yip penpen giy chip ñangyak rek, kuyip kalambis ayey mindeyak.

⁸ Biynimb gok ap nan-giy, Paylat nup kalambis bi bap per angniñyingipay rek angniñey angak,

⁹ “Kiyñ yomb nimbik ak, wisik yoknim akan angak.”

¹⁰ Yenen: nuk key niñak; bi Gor nup simbonjep yomb gok, Jiysis nup yikop miluk niñyak rek dap ñiyak.

¹¹ Pen bi Gor nup simbonjep yomb gok, biynimb gok kuyip angyak, Paylat nup angem, Barabas nup wisik yokiy; Jiysis nup kirgin-imuñ. Angeyak, biynimb gok Paylat nup angyak, “Barabas nup, chinup wisik yoknimin angyak.”

¹² Kun angeyak, Paylat angak, “Kun apim ak, kiyñ yomb nimbik anup yerginim?”

¹³ Angek, kiyk meñg miñgan dand araniy angyak, “Nup mon kiros bak biyon ñangbirik aynimimb angyak.”

¹⁴ Angeyak, Paylat angak, “Nuk tap yerip timey gek, kun ginim?” Angek, kiyk menj minjan dand araniy angyak, “Mon kiros bak biyon ñanğbirik aynimimb! Mon kiros bak biyon ñanğbirik aynimimb angyak!”

¹⁵ Angyak kun ak, biynimb gok kuyip tep ginimun angyi, Paylat Barabas nup yikop angyokiy, binuk gunap kuyip angak, “Jiysis nup miñ diy, tapin nep pikiy, amiybi gok kuyip ñem, dam mon kiros bak biyon ñanğbirik ayniñgiy angak.”

Bi Gor Anğniņep Korip Poliys Gok Jiysis Nup Anğjiwyak

(Mat 27:27-31; Jon 19:2-3)

¹⁶ Angek, amiybi gok Jiysis nup dand gapman biyomb Paylat korip ak amiy, bi kiyk gunap kuyip suk anğey apey,

¹⁷ chech likañ paryomb gapman yomb gok aypay rek ak dand apiy, Jiysis nup ayñiy, tap ñiwniw sek gunap tik dand apiy, kiyn aypay arband rek bap giy, jun biyon ayñiyak.

¹⁸ Ayñiy, nup poliys gipay rek chimkom diy angyak, “Jiwda kiyn yomb kiyk biy perper mindonimun angyak.”

¹⁹ Kun angyi, nup kur diy, jun biyon pikiy, kiñuk giñiy, mindek kiñiñ siñak koñgim yimiy, jun pañgyak.

²⁰ Nup kun giy anğjiwiy, chech likañ paryomb nup ayñiyak ak tuñgasik diy, chech nuk key ak ayñiy, ñanğbirik ayniñ dand sanđiyak.

Jiysis Nup Mon Kiros Bak Biyon Ñanğbirik Ayak
(Mat 27:32-44; Luk 23:26-43; Jon 19:17-27)

²¹ Kiyk namb okok amyinq, Saymon miñmon Sayriyniy nimb ak, okok giranġiy apiy Jerusalem amniġgek, nup namb pikiy minim kilis anġiy anġyak, “Jiysis nup mon kiros ak dand amnon anġyak.”

²² Pen kun giy amiy, Jiysis nup dand miñmon chip jun won tip ak, yimb Golgota apay ak am-jakiy,

²³ nup ñiġ wayn ak diy, malasin silik gunap sek ay ñeyak, ma ñiġak.

²⁴ Ma ñimbek, nup mon kiros bak biyoġ ñanġbirik ay, chech nup gok bilok keykey diniġ, sandiw gipay rek giyiġ diyak.

²⁵⁻²⁶ Pumb lim giy yep namb siġbikyon owak won ak, Jiysis nup ñanġbirik ay, yenen ñanġbirikyak minim ak kiros bak biyoġ tikay anġyak, “Jiwda kay kiyġ yomb kiyk ak anġyak.”

²⁷ Pen minek kun ak, bi tap siydep omiġal bap kunep ñanġbirik ayak. Bap gol pis bineġ, bap gol pis biym, Jiysis nup namb biyaġ ñanġbirik ayak.

²⁸ Giyak kun ak, Baybol buk ak tikiy, giġiġgambay anġyak rek nep giyak. Minim kun ak tikiy anġyak, “Nup niġey, bi tap timey gep bap rek ayġiġgamb anġyak.”

²⁹ Biynimb gok kiyk aran apyan giyiġ, Jiysis nup niġiy jun gormar giy, nup anġjiwiyiġ anġyak, “Gor anġniġep korip ak timbrikem, ñin omiġal nokom tip giġiġgayn apan ak,

³⁰ miñiy nand key giy kim amey, chin niġun anġyak.”

³¹ Gor nup simboġgep biyomb gok sek, bi low tiysa gok sek Jiysis nup kunep anġjiwiyiġ anġyak,

“Biynimb gunap kuyip gamb kim ambay rek, nuk key kunep giy kim amnan akan.

³² Per Yisrel biynimb kiyn yomb kiyk mindpiyn anġip rek, miñiy nup ñanġbirik aypay ak, key giy kim amek ker, niñind anġip anġiy niñun akan anġyak.” Pen bi Jiysis yip ñanġbirik ayak ominjal ak nup kunep anġjiwrik.

Jiysis Kumak

(Mat 27:45-56; Luk 23:44-49; Jon 19:28-30)

³³ Pumbnamb yomb biyon won ak kisyim apiy, mind dand amiy, pumb kuyim gak won ak tip melik gak.

³⁴ Melik gakniñ, Jiysis Jiwda minim ay, meng miñgan dand araniy anġak, “Eloy, Eloy, lema sambaktaniy anġak.” Minim anġak kun ak, kiñiñ nuk ak anġak, “Bapiy Gor! Bapiy Gor! Yip yenen kirpan anġiy anġak.”

³⁵ Anġek, biynimb mañ kun sinak mindeyak gok niñiy anġyak, “Niñim! Yilayja nup suk asap anġyak.”

³⁶ Pen bi bap tap kipromb rek band bap diy, ñiñg wayn maniy sikoy tawpay miñgan biyan tawek amek, Jiysis nup ñen ñiñan anġiy, gamil par ak di kambis ñanġiy, mindek biyon ñiying anġak, “Chin niñmindon, Yilayja apiy, nup tunġasik dam man biyan ayniñgamb akan anġak.”

³⁷ Kun anġiy niñmindyakniñ, Jiysis meng miñgan dand araniy minim yomb anġiy kumak.

³⁸ Won kun anep, chech paryomb Gor anġniñep korip ñiluk kapkap miñgan biyan pilgiyak ak, punġrik biyon biyan ay, miñgan sek mindek.

³⁹ Amiybi gok biyomb kiyk ak, kiros bak namb akniy ken sijak mindiy niñak, Jiysis kun angyi kumek, tap yerip yerip gak gok niñiy angak, “Niñind apay. Bi kun ak Gor Niñuk yimb angak.”

⁴⁰⁻⁴¹ Biyn Jiysis yip Jerusalem wiyak gunap ap gol sijak mindeyak. Namb kun ak, omiñal nokom Jiysis nup wonj siskoy gunap giñiyiñgipay miñmon Galiyliy. Bap yimb nuk Salomiy; Mariya omiñal. Biyn yimb along omiñal kun ak, bap miñmon Makdala nimb; bap Jemis yip, numam kisen Josis yip nonim ak. Biyn kun gok mañgiysek niñmindeyak, Jiysis kumak.

*Jiysis Nup Kamb Miñgan Ak Komyak
(Mat 27:57-61; Luk 23:50-55; Jon 19:38-42)*

⁴²⁻⁴³ Josep bi Armatiya nimb, Jiwda kanjsol tep yimb bap angyi niñiyiñgipay ak, Gor biynimb diy kond mindeniñgamb angyi kond mindiyiñgip. Bi kun ak niñimñam giniñg gakniñ, nuk amjakiy niñak Jiysis kumek, toy lotiw niñ ak, miñiy tunjasik dam komnim angyi; ma pirikiy, Paylat mindek ak amiy angniañak.

⁴⁴ Angniañek, Paylat Jiysis won akay kumimb angyi jiwdiy, poliys opiysa yomb anup angek apek angniañak. Angniañek angak, “Mindarik kumimb angak.”

⁴⁵ Kun angek, Paylat Josep nup angak, “Dam komninin angak.”

⁴⁶ Angek, Josep chech tund yomb bap tawiy, bi gunap yip Jiysis nup tunjasik dand apyapiy, mañgiysek pipkomiy, dam kamb miñgan kisenimb nep kilukiy, chip ma komyak miñgan ak

komyak. Komiy, kamb yomb bap tungmilokey amek, kawrumb ak pil giyak.

⁴⁷ Pen Mariya Makdala yip, Mariya Josis nonim yip niñmindrikniñ nup komyak.

16

Jiysis Kumiy Tikjakak

(Mat 28:1-8; Luk 24:1-12; Jon 20:1-10)

¹ Jiwda lotiw ñin kiyyak ak apiy pandikek, Mariya Makdala ak, Mariya Jemis nonim ak, biyy Sa-lomiy ak Jiysis mumbwak nup ak wel ayñinjun angyi, am wel kuyrep wak ak taw dap ayey kinak.

² Minek Sandey ñin ak maynamb yimb tikjakiy, Jiysis nup komyak bindon amning san diyak.

³ Namb okok amying angyak, “An chinup kamb yomb kawrumb pilgiyak ak, tungmilok dam gol okok ayningamb angyak.”

⁴ Kun angyi amjakiy niyyak: kamb yomb kawrumb pil giyak kun ak, gol okok mindek.

⁵ Niyy, miñgan bineñ sikind amiy niyyak: bi paranj chech tund paryomb yimak bap, ñin yipund kind okok ken bising mindek. Nup niyy pirikyak ak pen;

⁶ kuyip angak, “Ma piriknimimb. Yand niñbiyy; Jiysis bi Nasaret nimb, mon kiros bak biyon ñangbirik ayak anup niñning aswim. Pen niñim! Tip ar nup komyak biy; nuk ma mindip. Mindarik tikjakiy amimb.

⁷ Pen ma kumak ñin ak angak rek, nuk nind tikjakiy Galiyliy am mindeningamb; nimb kisen amiy nup niñningambim. Piyta sek, Jiysis binuk

gunap sek kuyip minim kun ak angñinimimb angak.”

⁸ Kun angak, mis amiy, jel pirikyak rek biyn-imb gunap kuyip minim kun ak ma angñiyak; pungrikind angiy korip amniyak.

*Mariya Makdala Nimb Ak Jiysis Nup Niñak
(Mat 28:9-10; Jon 20:11-18)*

⁹ Jiysis kumiy, Sandey ñin ak tikjakiy, nind yimb Mariya Makdala mindek siñak misen gek niñak. Pen biyn kun anup, nind kichekiy onep ar ak aban ayek, Jiysis ang mis yokak.

¹⁰ Nuk Jiysis nup niñiy, am binuk gok siy ang mindeyak namb ak, Jiysis kim mindip nup niñbiyn angak,

¹¹ kiyk pisnep kumimb angiy minim nup ak ma diyak.

*Jiysis Binuk Omiñal Kinjeñnamb Okok Amyiñg
Nup Niñrik
(Luk 24:13-15)*

¹² Minek bap pen tip ak, Jiysis binuk omiñal miñmon wikan bap girangiy, Jiysis bi ak key rek ay apiy, kinjeñnamb ak misen gek nup niñiy,

¹³ am binuk gunap kuyip angñer, kunep niñind aspiyr angiy ma niñyak.

*Minim Tep Yip Ak Biynimb Okok Kuyip
Angñinimimb Angak
(Mat 28:16-20; Luk 24:36-49; Jon 20:19-23; Ap 1:6-8)*

¹⁴ Pen minek bap tip ak, Jiysis binuk onep angip ak tap ñimbeyak namb siñak misen giy, kuyip ang giyiñg angak, “Tikjaken biynimb gunap misen

ninjiy anğey, yenen Gor Ñinuk ak ninjind tikjakip anğiy gos ak ma ninjbim?”

¹⁵ Kun anğiy kuyip anğak, “Minim tep yip ak dand miñmon okok mañgiysek amiy, biynimb okok mañgiysek anğñinimb.

¹⁶ Anğñem, biynimb an yip gosimb ninjiy, ñiñg pikniñgambay gok, kim amniñgambay. Pen biynimb an yesek apay anğniñgambay ak, kor yomb ninjiy, miñmon timey ak amniñgambay.

¹⁷⁻¹⁸ “Biynimb yip gosimb niñniñgambay gok, yip anğniñiy tap mageprek gunap giniñgambay, ñin gunap minim yimb kiyk ak mindakniñ, minim kisenimb ar bap key yimb anğniñgambay; siyñ saraw tap biynimb siwip gok diniñiy akan, tap ñimbiy kumbay gunap ñimbiy, ma kuniñgambay. Pen biynimb tap giniñgambay gok, kuyip ñin mañgiy diniñey suñ ay; kichekiy tap yerip gunap biynimb ambañ ayniñgambay gok, anğ mis yokniñgambay. Kiy yip minden tap mageprek kun gok giyakniñ, biynimb gok minim chinup anğñispay ak ninjind aspays anğiy, niñniñgambay anğak.”

*Gor Jiysis Nup Dand Miñmon Nuk Amnak
(Luk 24:50-53; Ap 1:9-11)*

¹⁹ Jiysis minim kun ak anğjiwakniñ, Nop nup dand arachak semb biyoñ amnak. Dand amek, ñin yipund kind okok ken mindip.

²⁰ Pen binuk gok minim tep ak miñmon okok kind kind anğñey amnakniñ, Biyomb ak minim kun ak ninjind aynimuñ anğiy, kuyip kond mindakniñ, tap mageprek gok giyiñgipay.

lxxxv

**Kalam Baybol Buk Gor minim nuk kisin
angayak
The New Testament in the Kalam Language of Papua
New Guinea
Nupela Testamen long tokples Kalam long Niugini**

copyright © 1992 Wycliffe Bible Translators, Inc.

Language: Kalam

Dialect: central

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-06

PDF generated using Haiola and XeLaTeX on 18 Apr 2025 from source files dated 31 Aug 2023

1491c109-3ee2-5565-9b83-06c480168547